

الإسكافي ملكاً

تأليف:

يسرى الجندي

تقديم:

سامي خشبة



الهيئة العامة لقصور الثقافة

نصوص مسرحية / شهرية / مايو ٢٠٠٢

• الأسكافي ملكا

الطبعة الأولى

نصوص

مسحقة

| | |
|-------------------|-------------------|
| رئيس التحرير | رئيس مجلس الإدارة |
| أبو العلا سلاموني | أنس الفقى |
| مدير التحرير | أمين عام النشر |
| محمود الطويل | محمد السيد عيد |
| سكرتير التحرير | الإشراف العام |
| الحسينى عمران | فكرى النقاش |

• المراسلات : باسم مدير التحرير على العنوان التالى:
١١٦ شارع أمين سامى قصر العينى
القاهرة - رقم بريدى ١١٥٦١

جساسة جديدة..
وميتافيزيقات قديمة...

فى هذا النص المسرحى البديع، يأخذ يسرى الجندى، مجموعة مهمة ومشهورة من «جواهر» التراث الحكائى الشعبى العربى إلى أفق جديد من آفاق المعاناة المعاصرة.. بل قد يكون واجباً أن نقول : «إن يسرى - الكاتب الدرامى السبعينى - وعياً وحساسية فى انتسابه إلى عصره - يأخذ تلك الجواهر من تراثنا الحكائى الشعبى - إلى : «الأفق الجديد» لمعاناة عصرنا»: أكون «السوق» هو «الدنيا»؟. أم تقوم الدنيا فى وعى الإنسان وفى خياله الخلاق، وليس للسوق قيمة إلا ما تحدده الإرادة الواعية التى توجه الخيال المطلق للإنسان الواعى أو ما تحدده «قوانين السوق» فتفرضه على «الناس الأشياء» المحرومين من الوعى ومن الخيال؟.. ويفرض يسرى الجندى ببساطة جذابة، أو حتى بسذاجة ماكراً لكاتب - شاعر - درامى أصيل، سؤالاً لا يستطيع أن يتجاهله ناقد للمسرح - بل : «متفرج محترف» على المسرح : ما المسرح - أو حتى : ما الدراما إذا لم يكن استنفاراً

للوعى وللخيال وللشاعر، من أجل مواجهة الأسئلة الصحيحة
بصحيح الأجوبة...؟

الجواهر التي يختارها يسرى الجندى من ألف ليلة، لا يمكن
أن تخطئها العين : حكايات معروف الإسكافي، وأبو صير وأبو
قير، وشقالق وإخوته، تحيطها - ربما - لمعات من كنز الليالي
الذي لا ينفد، لمعات قد تجدها في «حاسب كريم الدين» أو في
«علاء الدين أبى الشامات».. وهى جواهر نعرف أن بعض كتاب
الدrama - والمسرحية بوجه خاص - قد استخدموها قبل يسرى،
كل منهم لغرضه أو حسبما اكتشفه وعيه أو حدسه. ربما كان
أشهرهم هو الكاتب المسرحى الكبير الأستاذ ألفريد فرج.. غير
أن ما يكتشفه يسرى الجندى أو يحدسه، هو ما يحفظ للجواهر
قيمتها، كذلك فإن صياغة يسرى المتراوحة بين المواجهة الدرامية
والسرد الحكائى، وبين الصورة المتجسدة والحوار التحليلى، وبين
الشاعرية المنظومة والنثر الشعرى.. هذه الصياغة هى ما تحول
الاكتشاف أو الحدس إلى إبداع درامى بديع، يحتاج إليها
مسرحننا، وإدراكنا لحقائق عصرنا وإنسانيتنا معا ...
لم تعد تسمح تلك الحقائق - بعد - بما يمكن أن نسميه
«ميتافزيقا الحلم الأيديولوجى» التى حملتها رؤية ألفريد فرج فى

«التبريزى وتابعه قفة» حين استخدم حكايات شقالق ومعروف لى يؤكد ميتافيزيقا «حتمية» العدل إذا اقتسم كل الناس كل السوق (!!) دون أنتباه لا لدور الوعى ولا لدور الإرادة.. لقد اكتشفت الوعى، أو كشف حقائق التاريخ أن «السوق يكسب الدنيا» إذا تركت الدنيا لوهم «الحتمية».. الحقائق نفسها، لا تسمح الآن بما يمكن أن نسميه «ميتافيزيقا تغيب الواقع لصالح تصور مثالى بوضع قوة السوق فى ذات مكانة الوعى والحب - أو الوعى والقيم الإنسانية الرفيعة، مثلما فعل ألفريد فرج فى «الطيب والشرير» حين استخدم حكاية أبو صير وأبو قير لى يسمح لمثل حتمية السوق (الشرير) بأن يحاكم القيم الإنسانية التى ظل يهزمها باستمرار، بحجة أو تحت ستار أن هذه القيم لا تدافع عن نفسها بمنطق السوق ..

فلأن الزمان اختلف (بتعبير الشاعر محمد أبو سنة الشهير) ولأن حساسية الكاتب الدرامى السبعينى (كسب وعيه فى الستينيات، وتشكلت حساسيته فى السبعينيات المصرية من القرن العشرين) لابد أن تختلف عن حساسية (ولابد أن يختلف وعيه عن وعى) كاتب الأربعينيات والخمسينيات من القرن ذاته، فقد كان «لابد» للوعى أن يرفض ما يحاول العصر أن يؤكد

على لسان دمدمة - زوجة معروف :

دمدمة (تقاطعه) : بعدها وصحيت ع الغلب.. ولقيتك بتغرق
روحك وتغرقنى فى جنون ايه؟ مش شايف بصحيح
غير هبلك! مش شايف السوق اللي انت ف نين عينه
قاعد.. السوق هيه الدنيا يا معروف شوقها...

معروف : السوق هو الدنيا؟ غلطة ياسمسة لاء... الدنيا جوانا
مش فى السوق .

دمدمة : الدنيا هى السوق.. احنا هنا جواه ما نساوى ملين .
ولكن معروف يعود فيؤكد : «الدنيا جوانا يا سمسة، والسوق
هو اللي ما يسوى» .

حين ترمى التجربة (الجنية رفيف، بدلا من عفريت المرحاض
فى الحكاية الأصلية) بمعروف إلى «السوق» الذى تحكمه
الاحتمية الحقيقية (احتمية التهام الأقوى للأضعف، والأكثر مكرًا
للاكثر سذاجة.. إلخ) وتسيطر عليه - بالطبع - قوانين القمع
والتنميط (رغم أو بسبب قانون التنافس غير القانونى) بإلغاء
الالوان وحصرها فى لون واحد، متضافرة مع قوانين احتكار
التفكير والإرادة (رغم وهم حرية المرح أو العريضة) بإلغاء «حق
السؤال» أو طرح الأسئلة (وهذه إضافة رئيسة من جانب يسرى

الجندي إلى حكاية أبو صير وأبو قير).. حين ترمى هذه التجربة
بمعروف إلى هذا (السوق) المقهور ولكنه العاتى، يشهر المؤلف
فى وجهه سلاح معروف الأصلى - متعدد النصال : بديهية تعدد
الألوان وضرورته، وبديهية حق التساؤل وأولويته : بالتعدد
والتساؤل بتكامل الإنسان وتكتمل أصول حريته وهويته
الإنسانية معاً..

غير أن الشاعر الدرامى الذى ينظر إلى العالم «الحقيقى» -
ويأخذنا لى ننظر معه إليه، الشاعر الذى اكتسب وعيه فى
الستينيات واكتملت حساسيته فى السبعينيات من القرن
العشرين ولم يكف عن مراقبة العالم الحقيقى وهو يهوى فى
شرك القرن الجديد، مودعا سبيل «ميتافيزيقات» القرن المولى،
هذا الشاعر لا يريد - واعيا - أن يخدعنا بنهاية مريحة، مبهجة..
تقيم العدل - استنادا إلى قانون «حتمية» خاطئ.. أو تحول
المعركة إلى توازن بين السوق بكل شروره وبين كل القيم النبيلة..
ذلك أن الحكاية - إذا انتهت بهذه الراحة أو بهذا التوازن فإنها
ستكون مجرد خرافة جديدة..

لقد وظف يسرى الجندي خرافات الجواهر المأخوذة من
تراثنا الحكائى، لى يزيل عن إدراكنا للعالم الحقيقى ما تزخره

عليه - أو تزيفه أمامه - الخرافات المعاصرة، عن حقيقة كل من
السوق والشر والخير سواء بسواء ...
لذلك فإن من الطبيعي أن تنتهى هذه الدراما «الصادقة»
ومعروف - رغم انتصاره بالمنطق على التتميط والقمع - واقفا
تحت مقصلة الإعدام، والحبية التى حررها من الداخل، موشكة
على الموت بعده، والسوق (جزيرة النعاس) فى قبضة من صنعوا
حتميتها الحقيقة.. والبحث عن سبيل لتحويل «منطق» معروف
وخياله المبدع، إلى قوة قادرة على التحقيق، بحث مستمر، وحلم
لا يضيع

الإسكافي ملڪا

القسم الأول

(المسرح مظلم تتصاعد
موسيقى شهرزاد عن
ريمسكى كورساكوف) ثم
يتصاعد أيضا معها فى
الظلمة صوت الراوى) .

الراوى : ولما كانت الليلة التالية.. من ليالى ألف ليلة وليلة..
اتخذ الملك شهريار مجلسه.. وأقبلت عليه
شهرزاد كى تؤانسه.. وبدأت حديثها المعهود..
عما رواه الجدود..
(بقعه ضوء حول شهرزاد تجلس أسفل فراش
الملك.. وشهريار يقف بعيداً موليا ظهره) .
شهرزاد : بلغنى أيها الملك السعيد.. ذو الراى الرشيد.. إنه
كان فى قديم الزمان.. رجل فقير.. يدعى
الإسكافى معروف .

شهریار : (يستدير فى ضيق) .. كفى ..

شهرزاد : (تقف فى انزعاج) مولای غاضب من شهرزاد ؟

شهریار : من أخبرك بأنى طفل معتود ؟

شهرزاد : حاشای یا مولای

شهریار : إذن أنت المعتوهة بحكاياتك تلك

شهرزاد : أبعد ألف ليلة من الجمال والخيال؟

شهرزاد : (مقاطعاً) بل ألف ليلة من الخيال.. لم كل

شهریار : حكاياتك تلك البلهاء؟ ضيقت بها

شهرزاد : بلهاء؟

شهریار : وأقطع ما فيها.. حين تجىء نهاية كل حكاية..

شهرزاد : وقد انتصر الخير وساد.. واندثر الشر وباد

شهریار : (تخفى غيظها) وإذن مولای يكون سعيداً لو انتصر الشر وساد

شهرزاد : هو فعلاً ينتصر يسود ..

شهریار : (تنفجر غيظاً) الآن امرأة خانت مولای

شهریار : (بغضب أشد) سحقاً لك ونساء القصر جميعاً..

الشر فى العالم أبعد من نزوة امرأة .

شهرزاد : (فى شبه غناء) وكذا فى كل حكاياتى

شهریار : لا.. هي وهمٌ مضحك.. وحدي من يعرف ويرى

(يضرب الأرض بقدمه) من تلك النقطة.. وحتى

أقصى الأرض.. بدءاً من هذا القصر وحتى

أطراف العالم **(صمت)** الكل هنا في القصر

يعتقدون بأنني لا أفهم.. أنني لا أشهد ما خلف

الجدران وما خلف الأعين.. لكني أشهد.. أشهد

وجه الضبع ووجه الكلب ووجه الحية خلف

البسمات.. أشهده.. أوه.. حاشية ملعونة !

شهرزاد : **(في شيء من التعاطف)** إذن انظر يا مولاي لمن

خارج قصرك فعلاً.. لرعاياك وشعبك .

شهریار : **(في سخرية)** وأين كنت أختفي في كل ليلة يا

شهرزاد وأعود بغيش الفجر؟ أهرب تحت الأرض

مع الجن؟!

شهرزاد : أو كنت يا مولاي تخرج كي تلقى الناس؟ وبلا

أعوان أو حراس؟

شهریار : **(بعد لحظة صمت)** كي أكشف فيهم ما أفتقد

بحاشيتي.. لكن ما كان هناك إلا شر آخر..

تحولوا لتماثيل من ملح ونحاس.. أشباح تجري

خلف القوت.. ثم تموت .

شهرزاد : أشباح تجرى خلف القوت ؟!

شهریار : ثم أمد البصر لخارج مملكتي.. لطواغيت
وأصنام.. ملوك قبلى تتربع فى غابة.. فأرى كل
حدود الشر المهلك شر لا يدركه إلا من ينظر دون
خداع .

شهرزاد : (فى شفقته) مولاي ؟

شهریار : (ينسى نفسه أكثر) أشعر بالعجز أمام فساد
الدنيا وطبيعة هذا المخلوق الأحمق.. خلل مهلك
لا أملك تقويمه.. حتى لو كانت رقعة ملكى كل
الأرض.. حتى لو كان السلطان بكفى دون حدود
(ثم ينتفض مستعيداً غضبه وغروره) ثم تجيئين
وتحكين.. عن هذا الشر الأبله والخير الشرير .

شهرزاد : الشر الأبله والخير الماكر .

شهریار : لكن لم هذا كله؟.. حتى لا أقتلك.. حتى تغلت
رأسك من سيف الجراد بكل مساء؟ لا بأس.. أنا
الخط تلك اللعبة.. انتهت اللعبة.. انطلقى فرى
بحياتك هيا .

شهرزاد : (لا تتحرك وتنظر بسعادة) كَأَنكَ يا مولاي الليلة
تدعوني أَن أحكى عن معروف الإسكافي
بالتحديد .

شهریار : (بغضب عارم) أَتَجرينى ثانية لحكاياتك؟ أَقول لك
انطلقى.. انجى بنفسك يا امرأة .

شهرزاد : ولم؟ وأنا أَفتح بابا لسؤال.. كى تجد جوابا يا
مولاي

شهریار : (يقترِب منها ببطء) أى سؤال تعنين وأى جواب ؟

شهرزاد : كيف بأَنك يا مولاي تشعر بالعجز أمام فساد
الدنيا رغم السلطة والسلطان .

شهریار : وترى من سيقدم لى ردا ؟

شهرزاد : معروف .

شهریار : من هذا المعروف ؟

شهرزاد : من كنت سأحكى عنه.. فقير إسكافي لا يملك إلا
ما يملك إسكافي، لكن وينفس الوقت.. يملك مالا
تملك يا مولاي .

شهریار : ماذا قلتى ؟ ... ؟

شهرزاد : (دون خوف وفي اتهام) كانتك يا مولاي تتوى أن

تستدعى مسروراً .

شهریار : (ينفي التهمة) .. لا.. أبغى أن أسمع ثانية.. قولى

وببطء كى أفهم .

شهرزاد : قلت بأن الإسكافى يا مولاي لا يملك شيئاً.. لكن

هو يملك ما لا تملك .

شهریار : أده.. وإذن من بعد طویل حکایات.. انتقل الأمر

إلى الألباز.. وكيف به يملك ما لا أملك؟

شهرزاد : هذا ما تحكيه حكايته الآن..

شهریار : أده.. وإذن فهو استدراج.. لا.. لن تحكى وأنا لا

أبغى رداً.. وأنا وأآخر مرة..

شهرزاد : (تقاطعها) امنحنى تلك الليلة أيضاً يا مولاي

وحسب

شهریار : الليلة أيضاً؟ (صمت) إن لم يثبت أن المدعو

الإسكافى معروف يملك شيئاً حقاً لا أملكه

(صمت قصير) سيجىء السيف .

شهرزاد : أقبل يا مولاي لأجلك كاس الموت !!

شهریار : إذن احكى.. وأنا أثق بأنى سأتادى السيف.

(ترتفع شهرزاد ثانياً) .

شهریار : تبدأ قصتنا ثانية يا مولاي.. ومدينة معروف
الإسكافي.. تحتفل بعيد من أعجب أعياد
الناس.. إذ يختار الناس لهم ملكاً منهم لنهار
العيد وحسب.. ومن المدهش أن يختار الناس
الإسكافي دوماً إذ كان يغني.. وكانت كل عطايا
الملكية في يوم العيد.. غناء
(إظلام شامل.. ثم تبدأ حركة الاحتفالية من كل
اتجاه يصاحبها تصاعد تدريجي لإيقاعات أولية
وبقع ضوئية تتشكل وتتسع ليبدأ كرنفال
الاحتفال والذي تنصدره عربة معروف الإسكافي
في زى ملك إسكافي.. وحوله عرائسه التي تمثل
الأحذية بكل أنواعها.. وهو يغني لها.. ويغني لكل
شيء.. وكل شيء ممكن أن يرد على معروف..
إنه فرح بالناس بكل طوائفهم.. بالأشياء
والطبيعة.. والمعاني.. وهو ما يحكم السياق العام
والتبادل الغنائي على المستوى الفردي والجماعي
في الاحتفال كله) .

اللوحة الأولى

(يدخل التابلوه الأول)

(الغناء جماعى يتردد من

أكثر من موقع فى المكان.. ثم

يتجمع الحشد المتناثر فى

طابورين يمينا ويساراً فى

اتجاه المسرح) .

مجموعة : حرافيش

مجموعة : حرافيش

مجموعة : حرافيش

مجموعة : حرافيش

مجموعة : حرافيش

معا : وملكنا مغلس ومكانه عرش من الخيش

جماعة : حيوا يا حرافيش.. ملك الحرافيش

جماعة : معروف الإسكافي النافى وأبو الحناكيش
 (تكرار حتى يضاء حول معروف فى روب من
 الخيش محطى بالورد والخضرة وعلى رأسه تاج
 من القش وحوله عرائسه من الأحذية تتراقص) .
معروف : اللى ببيجي فى الريش بقشيش.. الليلة ملك..
 والصبح مفيش ولحد ماوش الفجر يهل
معا : (بتكرار) ح نساfer فى الأحلام ونعيش
 تكرار : ح نساfer فى الأحلام ونعيش
مجموعة : حييوا يا حرافيش ملك الحرافيش
مجموعة : معروف الإسكافي النافى وأبو الحناكيش (ترديد
 ما بين العرائس والبشر) .
معا : معروف واختارنا بالمعروف.. الليلة يكون ملك
 الحرافيش
مجموعة : طب ليه معروف؟ (تكرار للتساؤل فى كل
 المجموعات) .
معا : علشانه كريم.. مع إنه ما يملك ولا سليم
مجموعة : طب تيجى إزاي.. ح يوزع ايه.. ؟
 على كل رعاياه الحرافيش ؟

معروف : حيونى الأول.. يا مهابيش

جماعة : معروف مولانا يدوم.. ويعيش

معروف : قدموا كل فروض الطاعة.. بعدها ح ابسطكم يا حرافيش

(يبدأ بالصباغة والأقمشة الملونة، وعدد من الصباغين يفرون الأقمشة الملونة مع تصعيد تمتزج فيها الألوان فى تعددها وتداخلها مع التشكيلات عرائس ويشر وغناء فردى وجماعى.. ثم إظلام كامل.. وصوت دبكة فى الظلام ثم.. تضاء منطقة منزل معروف بأعلى المسرح.. معروف نائم ومازال تاج القش على رأسه وقد وضع ساقا على ساق فى رداء الخيش. تظهر دمدمة زوجته .

دمدمة : اصحى يا مولاي.. اصحى يا ملك الجرابيع

معروف : (يردد مقطعا من ختام التابلوه)

أنت جزيرة.. وأنت أميرة.. وأنت يا نجار..

بحصان من خشب الأرو يطير

دمدمة : اسم الله عليك يا خويا.. فرقت عليهم؟ أنت أميرة

وأنت جزيرة وأنت على حصان بيطير.. وأنت
متلقح هنا قدامى بخيشة على حصيرة.. (تندفع
نحوه تلكزه) يا فرحة قلبى بهبك وبفقرك.. قوم
فز وشوف صرمك.

معروف : (يصحو) طلع النهار

مدممة : أيوه يا مولاي يا بو خيشة طلع

معروف : (يتمطى) ألف خسارة يا سمسممة.. الليلة دي
كانت ليلة العمر .

مدممة : يا سلام.. ما العمر قصفته ومن بدرى يا معروف

معروف : (يقف ويتحرك كملك) كانت ليلة امبارح فرح
بحق.. الكل اتهدنا.. وزعت عليهم كل اللي قالوه..
يشهد ربنا ما حرمتش حد.. ولا حدش منهم روح
مكسور خاطر.. أو ناقص شىء.

مدممة : كدهه.. وزعت يا مولانا على رعاياك ايه؟ ذهب
ويا قوت.. وحرير سندس؟ تفاح وديوك؟

معروف : (يتحرك مازال) وزعت جناين ومدارين.. وجوارى
حنونة.. وطيور بتغنى وتتكلم وطعام وكأنه من
الحنه يا سمسم.. مسك وعنبر .

دمدمة : (تصرخ) بطل.. بطل.. بطل ح تجيب لى قضايا .

معروف : طب ليه.. تزعلى برضه يا سمسمه أن الناس تتنهنا .

دمدمة : ويطل سمسمه دى.. انا اسمى دمدمه بنت دمدم بن جحش

معروف : وأنا شايفك سمسمه يا حياتى.. ملكة كل نساء الأرض .

دمدمة : لا بقى شوف لك حل فى روحك.. زهقت.. من فقرك وجنانك .

معروف : (بدهشة بالغة) معروف مجنون وفقير؟ بعد اللى اتوزع على كل حبايبى من الحرافيش .

دمدمة : (تصرخ) ماتجننيتش وكفاية عليه تعودلى ليلاى مفلس.. شغال م الصبح لحد الليل وتعود لى مفلس، صرمهم بتصلحها بلاش .

معروف : (بجدية وغضب) ايه ذنب الناس يمشوا حافيين.. اللى معاد يدفع.. واللى مافيش تتعوض يا جميل.

دمدمة : وأنا.. والبيت.. والعيشة الهم

معروف : اطلبى ماتشتهى ويجيلك.. مافى شىء يغلى عليكى .

مدممة : (تصرخ) تانى يا معروف .

معروف : مش حتما دلوقت يا روحى.. ممكن يتاخر بعض الوقت.. لكن لابد ح يتحقق طلبك.. اطلبى يا حياتى .

مدممة : عايزنى اتجنن زيك واطلب قصر يا معروف وعبيد .

معروف : لو عرش المملكة فى بلاد الواقع.. اطلبى راح ييجى يا سمسة حتما ولابد بعد ماييجى مخلوق من البحر .

مدممة : لساك مستنى مخلوق؟ ماشى يا معروف.. انا ح اطلب بس لا عرش ولا عبيد ولا قصر .

معروف : اطلبى بس ولا يهملك

مدممة : عايزه كنافة يا معروف

معروف : قلتي ايه ؟ .

مدممة : كنافة بأربعة ملیم.. وسمنه باتنين ملیم.. وعسل باتنين ملیم بيها ترجع ماشى يا بعلی؟

معروف : (وهو ينفجر في الضحك) معقول يا ولاد... أحلام
سمسمه نور عيني وعائزه منى كثافة أنا قلت ح
تطلبى يا حياتى .

مدممة : (تقاطعه) هيه كثافة وبس كل امالى معاك
دلوقت.. ترجع لى وهيه فى ايدك .

معروف : ده طلب مايليق بمرات معروف نور عيني
سماسم.. لا.. لا اطلبى وبجد .

مدممة : هو ده طلبى أنا قلت.. (صمت) لكن وحياة روح
امى أن ما رجعت وهيه معاك.. لاح تقعد ويايا
ولاح اقعد وياك .

معروف : (يصيح فى زهول) إيه اللى سمعته؟ ده كان
الكون بيتهد.. قصاى الوقت .

مدممة : الكون يتهد عشان ماتجيب لى كثافه .

معروف : لا.. عشان الحب ده أعلى من أى كثافة.. الحب
ما بينا زى ما بيحزم ويللم كل حجارة الكون
بيحزم روحى وروحك وما يفصلنا مال ولا قوت .

مدممة : ولحد مانفطس ونموت.. دى حكاية وخلصت..
عشناها يدوب ايام .

معروف : الحب يا سمسة .

دممة : السوق فى إيديه ذهب وفى رجليه المرمر دول
خلاخل.. فوق جسمى هدوم كثير وقصور وعبيد
تحت الرجلين.. وقوافل شائلة من تقلها مايله
رايحة وجايه وجايبة السمن كثير وعسل قناطير..
وخبول وبغال وحمير وتلال غلة ولحمة كثير وعز
كثير.. وحشم وعبيد خدام.. وده كله فلوس من
غيرها الكل عليك ح يدوس ملعون ابو فقرك بقى
وافهم .

معروف : وده بقى حلمك كله الوقت.. فلوس ؟

دممة : وده شىء.. ما يخصك فيه شىء.. المطلوب دلوقت
وبس كنافه يا معروف .

معروف : والحب بره حسابك كله يا سمسة دلوقت .

دممة : (تصرخ) قلت اسمى دممة بنت دمدم بن جحش
واتوكل.. اتوكل على السوق .

معروف : على سوقى أنا.. مش سوقك يا مراتى.. سوق
فيه للحب مكان جوايا وف قلوب الناس وصباح
النور مهما اتاثر قلبك بالضلمه يا نور العين .

(إظلام وترتفع موسيقى فتاح يا عليم.. تضاء
المقدمة حول الحوانيت وهى تفتح فيما عدا
حانوت معروف.. والعطار حسين.. نشهد حانوت
الصباغ وصاحب أنوات الموسيقى.. وبائع
الورد.. والوراق.. معروف يدخل فى التابلوه
الغناء متبادلا الغناء مع جيرانه وهو ما بين فتح
الدكان ورص بضاعته.. محل عجوز سماك
يقطف سمك.. وامرأة يقفان بباب وتظهر خلال
الغناء قطة فى شكل عرائسى تتحرك راقصة فى
سباق الغناء ومع نهاية الغناء ينصرف كل الى
دكانه ومعروف إلى زبائنه) .

المرأة : ماشبعتش مغنى فى ليلة العيد

معروف : عمرى مايشبع م المغنى دى أبدا يا ام الخير

العجوز : طب هات البلغة.. ليلة العيد فاتت وأنا حافى يا
معروف

معروف : (وهو يحضر البلغة) سامحنى ياعم ابو ضيف..

ليلة امبارح كنت بلبى كل مطالب رعاياى
الحرافيش.. وادى نعل البلغة نضيف كانه مولود

اثولد ضاحك دمه خفيف

العجوز : بس الحقيقة أنا مكسوف.. لو بس تستنى شوية.

معروف : خلى المرة دى عليه.. وادفع مع البلغة الجاية.. أو
هات كام سمكة للقطة المجنونة ديه .

العجوز : مش شايف قطة .

معروف : انا شايفها.. ارمى لها هنا

العجوز : (يرمى سمكات للقطة العروسة فتقفز فى الهواء
لالتقاطها ومعروف يضحك) .

معروف : قطعة عجيبه كأنها جن.. بقالى مدة بشوفها
وماتون .

المرأة : (بدهشة) قطة ايه اللي شايفها انت ؟ طب حيلك
ويايا بقى.. بلغة حيلة أمه يا معروف .

معروف : (يعطيها البلغة) اتفضلى يا أم الحيلة .

المرأة : (تقلب فى البلغة) البلغة تمام ؟

معروف : اساليها يا ام الغلام

المرأة : أسأل البلغة يا معروف؟ لا ده جنان .

معروف : ما كل شىء فى الدنيا له لغة وبيان (ياخذ البلغة)
وأنا عشان اضبطها تمام وأدى معاها فى كلام

(ثم صائحاً) ولا انا غلطان يا حوش؟

الجيران : (يطلون معا من ابواب الحوانيت) كله جناحه تمام

فى تمام (ثم يرتدون ومعروف يشرع) .

معروف : كلمة ليا وكلمة ليها.. هيه تقول ايه بيها.. وأنا

بالمغراز عليها لحد الجسم ما يتدور.. والوش

ينور

الجيران : (يطلون ثانية)

المراة : يوه جتك ايه.. منك ليهم.. خد حقت كده بقى

شوف

معروف : ده كثير وليه يا طيبة ده

المراة : (تمضى) لك عندى حساب كان باقى

معروف : (يقبل النقود) سبحان الرزاق الباقي.. كده قربنا

من تمن المطلوب.. كثافة سمسمه.. وبقيت

حساب الوراق.. من كتب الحكايات .

حسين : (حسين العطار وقد دخل يفتح حانوته) حكايتك..

اللى ضيعت مخلوف..

معروف : يا صباح الخير يا ابو مخلوف .

حسين : (فى اتهام) مخلوف فين يا معروف

مـعـرـوف : مـخـلـوف صـاحـبـي وابتك ياعم حـسـين.. البـحـر نـدـه
عـلـيـه.. حـظـه نـادـاه جـاوبـه .

حـسـين : سـبـع سـنـين مـا اعـرف هـو فـين.. ان كـان نـادـاه
حـظـه.. أو نـادـاه قـضـاه وقـدره .

مـعـرـوف : مـخـلـوف نـدـاه حـظـه.. راح لـجـزـيرـة البـهـجـة الـلـي
حـكـيت لـه عـلـيـها.. وـكـان مـفـرـوض أـطـلـع وـيـاه.. لـوـلا
الـحـب الـلـي شـبـكـنـي بـسـمـسـمة وقـتـها.. لـكـن مـسـتـنـي
رـجـوعـه.. لـأـجـل أـرحـل وـيـاه.. نـكـمـل التـرحـال..
ونـحـقـق المـحـال .

حـسـين : مـخـلـوف ضـاع.. ضـيـعـته بـأـوهـامـك وكـفـايـة .

مـعـرـوف : مـخـلـوف راجـع.. بـعـد مـا يـمـسـك بـايـدـه التـور.. زى
اـنا مـا حـكـيت لـه تـمـام.. وزى اـبـويـا مـا كـان رـحـال
وحـكـالى وزـرع فـيـه أـمـالى لـأـجـل أكـمـل تـرحـال .

حـسـين : الله يـرحـمـه أـمـين أبـوك هـو كـمـان فـى الأـخـر ضـاع.

مـعـرـوف : أبـويـا مـا ضـاعـش.. وـلا مـخـلـوف ح يـضـيع.. طـلـعـوا
لـبـحـر التـرحـال الـلـي مـفـتـوح عـلى كـل خـيـال وجـمـال..
والـلـي بـيـفـتـح جـوانـا الدـنـيا ونـورـها ويـقـفـل عـلى
صـوت السـوق المـقـفـول.. الغـول .

حسين : (وهو يدخل لحانوته) لساك ودائر فى الكلام
والوهم يا مسكين .

معروف : أبدا يا عم حسين.. مش وهم ولا أنا مسكين.. ده
حلمى هو الحقيقة زى الحياة والموت قدر ولازم
يكون بالعقل أو بالجنون .

**(يغنى ويخرج مع غنائه الجيران ثانياً كل بيده
ما يصنع والقطة تتحرك حوله) .**

الحلم الجد.. اللى ما يترد.. اللى ما يتهد
واللى ما يسكنش فى أيها حد.. اللا ما يتمد
وعمره ما يلقي حاجز.. ولا حد
والحلم الحى.. اللى بيسألهم بكره الجى
وبقى اليوم اللى مالوش زى
فى عز الضلمه يشع الضى
والحلم الحق.. سما بتنشق.. وفضا بيطلق
وتخرج منه حروف نندق
فى قلب الصخر.. تخليه رق.. وي طرح ورد
الحلم الجد.. اللى ما يترد اللى ما يتهد.. إلخ

(مع نهاية الغناء يظهر كبير التجار قنزوح الذى
يمتطى بغلة يقودها عبدان أسودان.. يصرخ
ليوقف الغناء)

قنزوح : ملعون اليوم اللى جمعكم هنا جنب كبير التجار..
ملعون ده اليوم .

السوراق : ويصل قنزوح

معروف : (لقنزوح) يا صباح النور

قنزوح : وانت يا صرصار بالذات.. عمال بتقوق ليل
ونهار.. قالب الحته وقارف التجار.. فاكر نفسك
ايه؟ فاكر نفسك فين ؟

معروف : ده المغنى جميل يا سيد التجار المغنى غداء وكرم
يا كريم.. لو تحرم قلبك منه تموت.

قنزوح : انشا لله انت اللى تموت (ثم والعبيد ينحنون

ليهبط من فوق البغلة) على ايه بتغنى انت يا
ملعون.. نفسى افهم مرة.. وسط الفقر ده كله
وجاى لك نفس تغنى ازاي.. بتغنى لفقرك.. لقلة
عقلك والعيشة الهم.. انت وجرابيعك دول .

الصباغ : الله يسامحك ياسى قنزوح

قنـزوح : ده كفاية انكوا وسختوا شوارع مدينتنا ليلة
امبارح وقلقتوا راحتنا بهبلكم وعبلكم واللى
عملتوه بالخيشة ملك.. وراجع تانى وع الصبح
يغنى .. لا بقى .

مـعروف : (بصدق) ما هو لو بس تجرب مرة المغنى يا سى
قنـزوح

قنـزوح : (يصرخ) وكمان ح نقل حياك
مـعروف : أبدا مش قصدى أقل حيايا ولا قيمتك تتقل..
جرب كده ويايا وردد.. وصباحك يبقى منور..
والقلب ده فل (يبدأ فى فتاح يا عليم وهم خلفه).

قنـزوح : (يصرخ) حد يجيب لى كبير الشرطة يشيلهم
ويهد عليهم دكاكينهم دلوقت .

(إظلام.. ثم يضاء حول مجلس قنـزوح داخل
الوكالة وقد جلس بيده النرجيلة وأمامه يجلس
كبير الشرطة.. وقد وقف عدد من العبيد
وشرطيان) .

قنـزوح : لازم من طرد الإسكافى.. وطرد الكل معاه.. أنا
كل زباينى أكابر.. ودول حواليه أسافل

وأصاغر.. قاعدين فى الرايحة وفى الجاية..
قاطعين السكة عليه.. وكله ده كوم وغنى الملعون
ده لوحده كوم.. بيخلى عفاريت الدنيا قصادى
تقوم .

ر . الشرطة : للدرجة دى يا سيد قنزوح .

قنزوح : ولحد طلوع الروح.. ازاي؟ ازاي شحات زى ده
بيغنى سعيد؟ وأنا وأنت يارئيس الشرطة.. اللي
بايدنا المال والسلطة

ر. الشرطة : (يقاطعه) قبل ما تطلب انى أطردهم لازم
تعرف.. اللي بيحكمنى أنا وياك والناس دوله ..
الشرع اللي .

قنزوح : (يمسك كيسا ضخما ويلقى به تحت قدمى رئيس
الشرطة) اللي بيحكمنى ويحكم فى الكل دهه

ز. الشرطة : (وهو يرفع الكيس بكف واحد) اللي بيحكم
بالعدل.. لازم بيكون ميزان .. له كفه
(ثم يرفع يده الخالية) وكفه.. كمان

قنزوح : (وهو يضع فى كفه الخالية كيسا آخر) كده
ر. الشرطة : كده واكتمل العدل.. واتعدل الميزان .. لكن لسه

قنـزوح : (يقاطعه) لايكفاية طمع..وماتنساش أن أنا
مصلحتي وهييتي.. من مصلحة الشرطة وهيية
السلطان .

ر. الشرطة : اللي اقصده .. بعض دنانيرك لاجل مانحفظ
هيية الشرع ونقدمهم للجرايع تعويض.. ما أنت
تبني مكانهم..وكالات وكالات وحاجات

قنـزوح : ويغوروا كده؟

ر. الشرطة : أضمنها بالخوف والدنانير.. لكن ممكن يرفض
واحد منهم بس

قنـزوح : اوعاك تقصد معروف

ر. الشرطة : بالظبط تمام.. اللي سعيد بالفقر ده كله.. مش
سهل ح يقبل بالخوف أو بالدنانير

قنـزوح : (يمصرخ) كده ماعملناش حاجة

ر. الشرطة : لا .. تقدر... بالسجن

قنـزوح : ياريت .. والشنق يكون أحسن

ر. الشرطة : لكن برضه وبالشرع

قنـزوح : مش فاهم

ر. الشرطة : ح تشوف بس العملة دى بالتحديد.. متعبه جدا
لضميرى يا كبير التجار.
قنـزوح : (يضع كيسا آخر فى يده) كده وضميرك راح
يرتاح وينام ليل ونهار.. بس أنت وخلصنى .

إظلام

اللوحة الثانية

(يضاء بالمقدمة حول معروف
مع جيرانه فى غناء يقوده
معروف تحيط بهم الشرطة..
ورجال قنزوح يحملون أكياس
النقود)

معروف : (والمجموعة خلفه) لامش ح نبيع .

ونكون جرابيع

ونقل قيمتنا ونتمسخر

ونموت ونضيع

(تخفت الإضاءة مع استمرار الغناء هافتا

والتكوين متحركا .. وضاء بعده حول دمدمة

بأعلى فينزل معروف.. تصيح)

مممة : جت لك يامعروف أهى الدنانير عشان تسيب
جحر الصراصير وتقولّى بعدها مش ح تبيع..
لالا ياسبعى.. ده مش ح يصير و ح يسبقك كل
الجرايع والكل يبيع.

(ترتفع الإضاءة حول معروف وقد خرج من
الدائرة بعض زملائه واستلموا الأكياس وهو
مازال يردد مع الباقيين بالرفض)

معروف : أبدا مانبيع
ونكون جرايع (الجماعة تردد.. تخفت الإضاءة
ثانية)

مممة : كلمة أقولها وأنا بحبسها .. الدكانه الفقر
تسيبها .. والدنانير ح تروح تجيبها وأنا راح
أقولك تعمل ايه.. وتورها إزاي وفى أيه ..

(إضاءة ترتفع حيث بقى معروف وحده والكل
تسلم الأكياس وقد توقف الغناء)

معروف : (يصيح) وبقولها لك وبقولها لهم.. لا الدكانة ح
اسيبها ولا الدنانير دى ح أجيبها ولاحد ح يرسم
لى حياتى.. راح أكون معروف اللى أنا حاسة

اللى أنا عايزه اللى معروف.. المستنى يحقق

حلمه مخلوف.. واللى مش قادرين تشوفوه .

ر. الشرطة : (بأعلى وبجواره قنزوح) ولقينا الذهب المسروق

زى الموصوف متخبي ومتدارى هنا فى دكان

معروف

قنزوح : يبقى اللص الملعون معروف

القطعة : (القطعة الجنية تظهر لتتحول من قطعة إلى جنية)

اجرى بسرعة يامعروف

ر. الشرطة : امسكوا معروف اللص هاتوه

القطعة : امسك توبى يامعروف ح نظير

إظلام

اللوحة الثالثة

(إظلام .. ثم نشهد الجنية
تطير وقد تعلق بذيلها معروف
وهما فى بقعة ضوء أمام
خلفية من الأفق الليلي الموشى
بالنجوم وثمة حركة للسحب
فوق القمر)

معروف : (فى هلع) أنا فىن ؟

الجنية : فى الجو مع القطه يامعروف

معروف : ده صحيح فى الجو .. فى الجو؟ .. دنا متشعلق

فى الجو بجد ياناس.. طب ليه؟ ازاي.. مين أنتى

يابنت الايه ؟

الجنية : يعنى أكون ايه . جنية يامعروف .. جنية محنية .

وكانت قطه .

مَعْرُوف : جنية وكنتى القطة .. طب وحياة الجنية أمك..

وابوكى الجنى انزلى بيه على الأرض بقى

الجنية : ح انزل ماتخافش.. حالاح تكون يا حبيبى تحت

البحر

مَعْرُوف : البحر؟

الجنية : نتنفس براحتنا فى بيتنا

مَعْرُوف : الجنية دى بتقول البحر .. يانهار كحلى (يصرخ)

أنا قلت الأرض مش البحر يا جنية أنتى

الجنية : وأنا قلت البحر.. يا إما ح اسيبك تنزل ميت حتة

أه ..يعنى أنا كده ميت.. كده غرقان

مَعْرُوف : أحسن من أوضة السجنان.. وأرحم من دمدمه

الجنية : ولسانها

مَعْرُوف : وكمان سمسة عارفاهما ؟

الجنية : (تقلد دمدمه) ماتقولش سمسة دى.. أنا اسمى

دمدمة بنت دمدم أبو جحش

مَعْرُوف : (ضحك) ده أنتى صحيح عفريتة وبنت جن بحق

.. بس أنا كان نفسى ومن صغرى أظير وأشوف

الجان

الجنينة : وأنا كان نفسى ومن بدري.. أكلمك وتكلمنى..

واسمع غناك ليه لوحدى ..

معروف : غنايا .. بتقولى غنايا يا جنينة ؟

الجنينة : لكن مش بس غناك.. اللى نادانى إليك

معروف : الله بقى دى حكاية.. أنت اسمك ايه؟

الجنينة : أنا اسمى يانور عينى.. بيه تنادينى.. وأنا جاوبك

لو آخر الأرض.. رفيف

معروف : الاسم رفيف .. اسم جميل وشفيف

الجنينة : (تصيح فجأة) حاسب وامسك روحك نازلين

البحر الوقت ..

معروف : (يصيح) وأنا كده بالتأكد ضعت

إظلام

اللوحة الرابعة

(تحت البحر .. قاعة عرش
الملك خوف.. تبدأ اللوحة
بتابلوه.. حضور الملك خوف
للقاعة فى قوقعة الذهبية..
التابلوه حول القبة الكبيرة ملك
البحر المسقوف.. وملك ملوك
الجان فى عموم البحر.. إلخ..
والاحتفال بخروجه من قوقعة
الاعتكاف.. القاعة محاطة
بتشكيلات من القواقع
والشعب المرجانية والحيوانات
البحرية المشتركة)

حوف : (بعد التابلوه) والآن . يا وزير هدير.. بعد

خروجنا من القوقعة الذهبية بعد الاعتكاف
والتأمل فى أحوال الكون.. ماذا جرى وجد من
أحوال فى مملكة مولاكم حوف ؟

هدير : (الوزير) مولاي الملك حوف.. ملك البحر المسقوف

مولاتى الأميرة رفيق اختفت

حوف : اختفت؟.. اختفت يعنى ايه ؟

هدير : أطلقنا الأعوان فى كل مكان ماسبنا فى البحر

كهف.. أو حتى شق تعبان.. ومافيه دليل ومافيه
سبيل.. مولاي

حوف : امال بنتى راحت فىن؟ دى فيها عمرك لو

ماعرفتش يا وزير

هدير : على ايه .. ما أنا أقول وخلص

حوف : يبقى انطق يابلاص

هدير : الأميرة طلعت على وش الأرض يامولاي

حوف : وش الأرض؟ طلعت بتعمل ايه على وش الأرض

مع المخاليق الهايفه اللى هناك ؟

هدير : مولاي أنا بتالم .. ومهما كان لازم اتكلم

حـوـف : قول ماتتقطينش واتكلم

هـديـر : مولاتى الاميرة رفيق.. بتحب إنسى فوق الأرض

حـوـف : اخرس .. بقى عشان رفضت الجوار منك يا حقيير

جاي دلوقت تقول

هـديـر : (يقاطعه) مولاي ح استدعى الجنى اللى وصل

ليها هناك وشافها ويا الإنسانى الملعون المدعو

الإسكافى معروف.. استدعيه واسمع منه

حـوـف : اسمع يا وزير لو طلع الكلام الحقيير ده من

الأوهام ح يبقى حبسك فى القمقم لالف عام..

لا.. ميت الف عام

وانا قابل الحكم يامولاي.. مهما كان

الحاجب : مولاي الملك حوفا.. فيطت للبحر الآن الاميرة

رفيف ومعها إنسى فى عليه إزاز.

حـوـف : إنسى معها وفى عليه إزاز ؟

هـديـر : صدقت يا مولاي.. خدامك ماكديش عليك

(من أعلى رفيق حاملة معروف داخل صندوق

زجاجى تهبط به)

رفيف : مولاي الملك حوفا.. والذى الحنون الرؤوف

حـوف : كنت فين يارفيف ؟
رفـيف : كنت بجيب معروف
هـدير : وهو ده اسمه .. وكلامى كده بيبقى صحيح
رفـيف : كلامك عن آيه يا رزيل .. يابو دم تقيل .. (تصرخ فيه) سيبنى اتكلم
حـوف : خرجوا الإنسى ده حالا قبل ماتتكلم
هـدير : بنفسى ح اخرجہ يامولای
رفـيف : ماتلمس معروف ياحقير .. سكت يا والدى
خدامك. لحد ما أخرج معروف قدامك
رفـيف : (وهى تنتحنى لترفع الغطاء) ساعد يامعروف
رفيف .. أنت الإنسى وأنا الجنية .. بس أنا دلوقت
اللى محتاجالك .. ساعدنى لاجل ماتبقالى
وابقالك (يعتدل معروف جالساً فى الصندوق) ..
معروف يا حبيبي
معروف : أنا فين ؟
رفـيف : أنت هنا فى مملكة البحر معايا
معروف : (يلور حول نفسه فى دعر) أنا فى البحر؟ يعنى
غرقت .. غرقت فى الميه؟ تعالى يا دمدمة وصوتى

عليه .. (يرتقى ثانية مغشيا عليه.. داخل

الصندوق).

رفيف : معروف

حـوـف : هو دة الإنسى المذكور .. هايف مذعور.. يطلع

ايه ده اللي جبتيه؟ ردى يابنت حوف ده يطلع

ايه.

رفيف : يطلع إنسى فقير وضعيف.. ولايملك م الدنيا حق

رغيف.. لكن قلبي اختاره خلاص

صـوـت : يبقى اتجنتنى يابنت ملك الجان

هـديـر : أحقر حقراء الجان مايفضله إنسى مهما كان

يامولاي.. إزاي ده يحصل وتسمح بيه

رفيف : اسكت أنت يارزبل.. كلامى مع والدى ومش

معاك

حـوـف : ويسكت ليه؟ ما خلاص بقت فضيحة وراكبة

جنان.. إزاي بنت ملك الجان .. تبص لانسان

هـديـر : الجان همه السادة ع البنى آدمين

حـوـف : الإنس دول ضعفا تافهين فارغين لكن احنا

السادة زى ما قال..الجان هم أصحاب القدرة..

والقدرة فى إيدنا مالها حدود.. كل كنوز الأرض
المخبوءة بنتحكم فيها.. والأرض بأكملها فى
قبضتنا وتحت أمرنا رحمتنا.. فى البحر
نغوص.. فى النار بنتشكل كيف مانحب فى
السما بنطير وفى لحظة مانعوز ونقرر.. بنهد
الدنيا ع اللى بيرفع راسه من جنس البنى
أدمين.. ييجى بعد ده كله انتى يابنت كبير
الجان.. وتحبى منهم جربوع.. كمان ايه قلت أنت
ياوزير ؟

هدير : إسكافى يامولاي.. يعنى بيصلح صرم.. وصرم
قديمة كمان

حروف : وصرماتى كمان يارفيف؟ طب ماسالتيش نفسك
فى الأول مين همه

البنى أدمين؟ قبل ماتقولى اخترتيه وخلاص
رفيف : من غير ما اسأل عارفة.. البنى أدمين مخاليق
ضعفا عاجزين .. مربوطين للمكان.. ومهزومين
بالزمان والقادر بينهم مهما كان فى لحظة القوة
تتحول عنده لكذبة وطيف.

حـووف : طب ايه بقى بايشت حووف؟ ماهى واضحة اهى

رفـفـيف : لكن معروف غير كده خالص

حـووف : (يصرخ) رجعتا تانى للجنان؟ مش معروف ده
بنى آدم منهم

رفـفـيف : لكنه اقوى برغم الزمان والمكان.. وضعيف البنى
أدمنين.. معروف اقوى.. عنتى من الجان.. وده
سرده اللي عرفته وشيككى وشيك قلبى

حـووف : الاسكافى اقوى من الجبان يا جبان (يصيح)
اخلوا المكان.. وخرجوا الأعوان .. مش لازم حد
يسمع كلام الأميرة.. دى مصيبة كبيرة

هـديـير : اخلوا المكان.. ايه بقى سرده الباتع ؟

حـاجـب : (مع خروج الأعوان) مولاي الملك حووف كمان
عجايز البحر الحكماء طالين لقاء.. لقاء عاجل
ويرد فى انتظار أمر

حـووف : هيه كمان وصلت لعجايز البحر المسقوف.. ياما
لسه بسببك راح أشوف دخولهم (مدخل غنائى
لدخول العجايز الحكماء).

حـوـف : أهلا بعجائز البحر المسقوف.. قولوا اللي عندكم
على طول .. لأن أنا تعبان .. هاتوا من الآخر
يعنى

عجوز ١ : بنتك رفيف.. يا حوف دايم بتقلق راحتنا
عجوز ١ : وتمللى تقل قيمتنا.. وتكسر نواميسنا وحكمتنا
هدير : الأميرة راح تعترف بغلطتها.. ومولاتا ح يخرجها
من ورطتها
رفيف : لاهى غلطة .. ولا اتورطت فى ورطة واسمعوا يا
عجائز الجان انتو كمان

حـوـف : لسه ح تكابرى قصادهم وقصادى سيبنى اتفاهم
وياهم

عجوز ٢ : مش هيه مصدر قلقنا المرة دى
عجوز : لكن الإنسى اللي وياها.. اللي نزل مملكة البحر
معاها

عجوز ٢ : من ساعة وصوله البحر اتهزت أوصاله
عجوز ٣ : قربوه هنا نشوفه قربوه (يقربون به أمامهم)
العجائز : (معا) ابعدوه.. ابعدوه
حـوـف : فيه ايه لقيتوه

عجوز ٢ : الانسى ده خطير.. خطر أكيد

هدير : وده ايه يكون خطره.. ده مجرد هلفوت

عجوز ١ : من كام ألف عام كان فيه إنسى فى نفس عمره

اتحدى سطوة كل الجن وصدقوة الناس

عجوز ٢ : وساعتها.. هن هيبتنا وقل قيمتنا

عجوز ٣ : وده اللي خلا نا بعدها نخط جزيرة النعاس تحت

نظرنا.. وتبقى مربوطة بأوامرنا

حشوف : يعنى ح يجرالنا ايه وده مين عشان نخاف منه

العجائز : (يخرجون) قلنا ابعده.. ابعده

أحدهم : نفذ يا حشوف واقض أمرك.. ابعده حالا عن

مملكتك

العجائز : (معا) وغير كده ح تندم .. ندم.. ندم.. ندم

رفيف : شفت يا والدى اللي انت مستصغر شأنه..

العجائز الحكما خايفين منه

عايزانى كمان أخاف منه“ لابقى يابنت حوف كل

مسالك الإنس فى كل الأرض بالطول والعرض

رفيف : الكلام عن معروف مش عن كل الأرض.. أثبت أنك

مش خايف منه الوقت ورد على العجائز دول..

حوف : تقصدى ايه بقى يعنى ؟
رفيف : خليه .. ابقى عليه واتحدى الخوف فيه ..
هدير : مولاي ملك الجان يتحدى الخوف فى إنسى تافه
زى ده .. ده كلام مهين
رفيف : اسكت أنت يا كهين .. ورد ياوالدى عليه
حوف : عايزانى أثبت ايه بالظبط يابنت حوف
رفيف : تثبت أنك تقدر عليه يا والدى
حوف : وإزاي اثبت ده ياروح والدك
رفيف : دى سهله خالص .. على الجزيرة اللي فوقنا ..
ارميه .. وشوف ازاي ح يغير سكانها ويبدل
قوانينها أو يفشل .. وهية الجزيرة تحت سلطانك
بتعمل فيها مابدا لك .. وكل قوانينها انتو اللي
حطينها
هدير : اوعاك يامولاي تسمع كلامها .. الاميرة ناويه
هناك تواعده .. وبالسحر تساعد
رفيف : اتأدب ياوزير .. أنا الاميرة رفيف بنت ملك الجان
العظيم حوف .. الكذب ما اعرفوش .. أنا لا ح
أواعده ولا ح اساعده .. ودى كلمة خلاص قلتها

حـووف : وأنا يابنت حووف قبلت تحديك الهزلى ده عشان

ارجع لك عقلك وتغوى

رفـيف : بس بشرط ياوالدى

هـدير : دى كمان ح تشرط يامولاي

رفـيف : زى أنا ماوعدت مااساعدوش.. محدش من الجن

يقرب ليه.. بالذات الوزير هدير الحقيير

حـووف : وشرطك مقبول برخصة.. وح نشوف

هـدير : طب يامولاي لو فشل يغير شىء من قوانيننا..

واتأكدت ساعتها قدرتنا.. والفرق بين عظمة

الجان وضالة الإنسان؟ الرد ح يكون ايه؟

رفـيف : عارف اللى فى قلبك ياخسيس.. وأنا جاهزة

ياوالدى لو فشل معروف

حـووف : وح يكون انقطع عقاب فعلا عشان غطتيني

وكدتبتي وعقابى الخطير والشر المستطير.. أنك

تتجوزى هدير

رفـيف : لا .. ده تمن فطيع.. الموت أرحم منه

هـدير : مولاي قال وحكم.

حـوـف : يا حراس.. مع طلعة الشمس شيلوه وطلعوه
وفوق جزيرة النعاس وارموه
رـفـيـف اوعاك تخذلنى يامعروف.. (تتابع من يحملونه)
إوعاك تخذلنى يامعروف
(حاملو الصندوق يمضون فى البحر .. وخلفهم
تمضى رفيف.. فى أغنية حول هذا المعنى فى
بانوراما خلفية متحركة) (مع نهاية الأغنية)

إظلام

اللوحة الخامسة

(سوق جزيرة النعاس..
ومعروف نائم فى مقدمة
المسرح السوق يبدو خاليا من
البشر تماما رغم أن الحوانيت
كلها مفتوحة والبضائع عليها
مرصوصة.. الخلفية تكشف
سماء الجزيرة وبها طيور
تحلق ونسمع أصوات مع
أصواتاً الأمواج المباني تبدو
جميعاً بلون واحد أصفر
بدرجاته نرى معروف الذى
استيقظ يعتدل متلفتاً فى
دهشة)

معروف : ايه اللي جابنى هنا؟ آخر حاجة كنت فين؟ أه
كنت مع الجنية طائر.. بعدها ايه؟ يانهار.. تحت
البحر أنا كنت وياها؟ طب دلوقت فين.. ايه ده؟
(قد بدأ يتحرك) ده سوق.. سوق لكن من غير
ناس والسوق ده.. قريب من البحر أهه.. طب
فين الناس؟ يمكن لسه أحنا الصبح مافتحوش..
لادول فاتحين وماجوش.. وكل شىء مفروش..
والبيبان مفتحة والبضايح ملقحه بضايح كثير
(يتحرك بين عربات الخضار والفاكهة) والفاكهة
صابحة وطازة أهى **(يتوقف عند دكان**
القطايرى) لا والقطير سخن ملهلب وبرضة طازة
(يتنوق) وطعمه آخر لاذة.. طب بقى ازاي؟
سوق من غير بايع ولامشترى.. ولا ظاهر
ولامتدارى **(يطل عند ناصية)** يمكن طلعا بيعوا
فى الحوارى.. بس الحوارى برضه فاضيه
والبيوت متقفلة شبابيك وأبواب الله طب ده
معناته ايه يامعروف؟ شىء يحير ويزيد الواحد
خوف على خوف.. **(صوت طبول تقترب)**.. ده

صوت طبول.. يعنى ناس الله (الطبول معها غناء
موقع يقترب) طبول وناس زى مايكونوا بيزعقوا
وهمه بيجزوا (يندفع إلى المسرح حشد من الجند
بملايس صفراء داكنة فى أداء موقع عالٍ وخشن
يحمل تهديداً لكل من يظهر فى المكان.. أو يطل
من النوافذ والأبواب حيث موكب الأميرة قوت
القلوب.. معروف يتدارى قبل أن يروه داخل
مكان الفطاييرى.. ثم يظهر موكب وهودج قوت
القلوب محاطا بالحرس الأشداء .. معروف يرفع
رأسه فى فضول . حيث رفعت ستارة الهودج
وظهرت الأميرة قوت القلوب وجاريتها زوية..
قوت القلوب تشير فيتوقف الهودج).

زوية : مالك يا أميرة قوت

قسوت : زهقانة موت.. محكوم عليه أشوف جزيرة
النحاس من غير إحساس لأفيها حس ولأفيها
ناس.. ارجع أحسن

زوية : ماهو مولانا الملك جعبوب خايف عليكى.. لاحد
من أهل الجزيرة ياذيكى

قوت : وايه يخلي أهل الجزيرة وحشين للدرجة دى؟

غلبت أسأل ما حد رد جواب.. ولا شفت بنفسى

عشان أحكم

زوية : ما أنتى يامولاتى عارفة.. مالناش نسأل أى

سؤال

قوت : طلب ليه

زوية : اتعلمنا يامولاتى نصدق اللي يقولوا عليه

قوت : برضه بسأل ليه

زوية : (فى جزع) مولاتى .. فيه راجل بيطل علينا هنا

فى السوق

قوت : (بلهفة) معقول هو فين

زوية : (تشير) هناك آهه.. ولبسه غريب.. ده يا إما

مجنون بقى مش من الجزيرة هنا.. (تنادى

يا حراس)

قوت : (بسرعة) لا بلاش حراس

زوية : دى أوامر الوزير برجاس

قوت : لو خدوه ح يقتلوه.. ويكون سبب موته أنا

زوية : لكن يا مولاتى.

قوت : بلاش يازوية وحياتي.. وبيننا نبعد من السوق

(يخرج الهودج مع الحراس)

معروف : (الذي خرج من دكان الفطاييرى) دى أكيد الملكة

أو بنت كبيرهم.. إنما ليه بيفضوا لها المدينة دى

نزهة باردة وحزينة.. بس جميلة.. رقيقة أرق من

اللازم.. أو يعنى كده علية.. زهرة علية جميلة

(رفيف تظهر فى الهواء خلفه)

رفيف : للدرجة دى الأميرة قوت القلوب عجبك يامعروف

ومتحير فى وصفها ونأيه

معروف : مين؟ هو أنتى .. الجنيه

رفيف : أما إلك صحيح سخيف.. لسه ماحفظتش اسم

رفيف

معروف : ايه اللى عملتية فيه؟ أيه اللى عملتية فيه؟

رفيف : خلينا فى البنت ديه .. قلت عليها رقيقة وجميلة ..

صح؟

معروف : أنا فى أيه ولا أيه؟ خليكى فى سؤالى وردى عليه

رفيف : لسه بتسأل مش فاهم؟ وأنا اللى بمدح فيك

ويقول

مـعـرـوف : من شط البحر عندنا .. للسما فوق هنا .. ومن
الشعبطة فى الجو .. لحد تحت البحر .. والوقت
هنا فى سوق فاضى

رـفـيـف : يعنى كان أحسن لك تفضل جنب مراتك دمدمة
تذل فيك وفى إيد التاجر قنزوح عشان فى
السجن يرمىك؟

مـعـرـوف : بس كنت ابقى فاهم اللى بيحصل معايا ده أيه
وليه .. لكن كده مش فاهم ليه ولافين ولامين

رـفـيـف : وخیالك الجمیل راح فین .. خلیه یصور لك حالک ..
وسبب اللى بیجرالك .. حرك یامعروف خیالك .. ده
خیالك أجمل مافیک

مـعـرـوف : عایزانی اتخیل ایه؟

رـفـيـف : زى ماكنت ملك الحرافيش .. لابس الخيش وكأنه
توب الملوك .. وبإيدك بتفرق على المخاليق كل الى
بيطلبوه ولأنسيت الليلة الحلوه؟

مـعـرـوف : مش أعرف الأول راسى من رجليه .. وأيه ده اللى
حواليه .. ولا أنتى جنية غبية.

رفسييف : لا لم لسانك بقى.. وأهم حولك يا جميل.. واجه
معالم الويل.. (يلتفت حيث أقبل الناس للسوق
فى ثيابهم الصفراء)

معروف : دول رجعوا صحيح.. الله لابسين برضه أصفر
زى العسكر.. لا وبيوتهم ياجنيه (يلتفت حيث
اختفت) الله.. رحىتى فين ؟ أنتى ياجنيه..
يارفدغ.. ردى عليه ماتسبينيش فى الحوسة ديه..
(خلال ندائه يلتفت حوله بعض الناس فى دهشة
وهم ينظرون إلى ملابسه الملونة معروف يبتسم
لهم ولكنهم على دهشتهم يتراجعون إلى الخلف
ببطء)

معروف : ايه مالكم.. فيه ايه

أحمد : ومش عارف فيه ايه

معروف : لابس ألوان يانعين

أخـر : مالها الألوان

أخـر : ده بيسال كمان

معروف : ده أنا اللي مفروض أسالكم.. ازاي كلكوا
لابسين أصفر.. وكان العسكر أصفر.. وبيوتكم

والدكاكين أصفر.. ازاي مفيش عندكو ألوان غير
الأصفر .

أحدهم : تاني الألوان

معروف : مالها الألوان؟ طب بصوا كده واسمعوا مني

(يشير تباعا إلى الألوان في غناء عن كل لون..

وتظهر ربود الفعل من تراجع ورعب وسد الأذان

حتى يصل شرطى صائحا)

الشرطى : ايه اللي بيحصل فى السوق ده (معروف يتوقف

عن الغناء)

أحدهم : تعالى الحق شوف.. راجل لابس ألوان

آخر : وبيغنى كمان.. كسر فرمان.. وراه فرمان

الشرطى : يانهارك أسود.. بتغنى.. وكمان لابس ألوان؟

أحدهم : ده ضرورى مؤكد مش من جزيرة النعاس.. مش

مننا

معروف : (لنفسه) طلعت جزيرة .. وكمان نعاس

الشرطى : قدامى بسرعة على الدرك

معروف : طب بس صبرك أفهمك

الشرطى : قدامى قلت على الدرك.. وكله يشوف حاله

ومالوش دعوة بغيره (يتفرقون)

معروف : ياعم بس استنى وافهم منى.. وزى ماتفهم منى

فهمنى.. ماهو ربنا خلق العقل عشان ناخد مع

بعض وندى.. واللى حصل لى هناك وهنا

الشرطى : كلامى وياك فى الدرك (يدفعه) ويالله قدامى مد..

كفاية خضيت الرعية.. لخبطت نظام السوق

(تاجر يتوقف فى دهشة)

معروف : طب بالذوق.. ماتزقش جاى معاك

التاجر : استنى ياعسكرى لو تسمح

الشرطى : ح تقول لابس ألوان.. وتساءل فى الحكاية

والرواية

التاجر : وأسأل ليه وأنا عارف فعلا ليه

الشرطى : عارف ليه لابس ألوان؟

التاجر : طبعا .. دنا مستنيه

معروف : مستينى

التاجر : ده لسه واصل فى مركب الفجرية.. وأكد كان

من ساعتها بيدور عليه

الشرطى : وده يطلع ايه؟

التاجر : تاجر وجاى فى تجارة

الشرطى : وأيه الأمانة.. أنه جاى فى تجارة وماشى

التاجر : موجود عند الشهبندر اسمه

الشرطى : يبقى حالا يالاً فوراً ويغير الهدوم الألوان ويجيب

الإذن من الشهبندر عشان يفضل.. لحد مايرحل

التاجر : من غير ماتقول كله ح يحصل .. وانتفضل ويايا

ياسيد عدنان

معروف : عدنان

التاجر : ايه؟ هو اللي حصل نساك اسمك ياسيد عدنان

(اظلام ثم يضاء بأعلى صحن منزل التاجر حيث

انتهى معروف من الطعام)

معروف : لحد كده مليت بطنى.. والوقت بقى تجاوبنى ايه

حكاية جزيرتكم اللي لافيهها ألوان ولا مغنى.. لا

والأهم بقى الوقت أنت أصلا ليه خدتنى ومن

ايدين العسكرى خلصتتى؟ ليه قلت عارفنى

وعمرك ما عرفتتى؟

التاجر : فيه سؤال .. لو عندك جوابه.. ح تعرف الدور من بابہ

معروف : وایہ سؤالک یا امیر

التاجر : تعرف عم حسين العطار

معروف : يانهار.. وكمان عارف عم حسين العطار

التاجر : وأعرف كتمان ابنه اللي سابه وهج من سنين
ويكان شقى منكاف ملعون

معروف : تعرف مخلوف

التاجر : أيوه يامعروف

معروف : مخلوف

مخلوف : مانتش مكسوف من نفسك حد مايعرفش
صاحبه اللي كان دايما جنبه يخانقه ويلاعبه
ياقليل الاصل يادون ..

معروف : لامستحيل .. ده جنون.. مخلوف

مخلوف : بالحضن يامعروف.. لكن ازاي وصلت هنا .. ده
من بلدنا لحد الجزيرة دى سفر بالبحر ميت يوم
وليلة بالقليلة.

معروف : دى حكاية طويلة يامخلوف

مخلوف : ازاى ؟

(تخفت الإضاءة حولهما ويستمران فى الحديث
مايتم ويضاء حول رفيف فى منطقة أخرى تهبط
إلى الأرض بالقرب منهما)

رفيف : أهو ده اللي ماعملش حسابه الملك حووف ولا
الوزير الحقيقير هدير.. أنك تلاقى فى الجزيرة
صاحبك ووليفك مخلوف يامعروف.. يعنى الحظ
معاك.. ورينى بقى فنونك؟ وجنونك.. ولع فى
خيالك معاه (رفيف تقفز إلى دائرة معروف
ومخلوف حيث ترتفع الإضاءة وهما يتحدثان)

مخلوف : طب وايه حدف الجنيه عليك

رفيف : مش هو ده مخلوف

معروف : هو أنتى

رفيف : ده اللي بخيالك شجعته.. وعلى مستقبله شيعته
هنا حقق حلمه وبقى تاجر له صيت

مخلوف : بتكلم مين يامعروف ؟

معروف : الجنيه .. ماهى قدامك أهى

رفيف : مش ح يشوفنى .. بس أنت هاودنى وأبعد من

الوقتى .. عن البنت اللى لحست عقلك .. وفوق

لشغلك يا حبيبى ده مش هزار

معروف : بنت مين يا مجنونة أنتى

رفيف : حيلة أبوها .. وعين اللى جابوها .. الأميرة قوت

يامعروف

مخلوف : معروف لساك بتكلم برضه الجنيه ؟

رفيف : خليك مع صاحبك وسن خيالك وأبدأ وريهم بلاش

كسل ومياعة

معروف : وكمان وصلنا للشتيمة يا جنيه

مخلوف : ودى بتشتك ليه

معروف : اسألها ليه .. وعائزه أيه بالظبط منى ؟ عشان أيه

تفضل كده تخيلنى .. أهى غارت .. كمل بقى

كلام

مخلوف : أنا بصراحة ح أقولك وعن حقيقة حالى ح ادلك

يامعروف

معروف : ماهى زى ما قالت الجنية .. حلمت ويايا واتحقق

حلمك .. طلعت البحر .. ورحت بلاد الله وبقيت

عظيم الجاه.

مخلف : ده اللي باين لك يامعروف.. وكالة مفتوحة..
وعيشة بحبوحة.. لكن الحقيقة أنا فى زنقة
مايعلم بيها غير الله.. أخوك مفلس

معروف : مفلس (تخفت الإضاءة حولهما وتظهر رفيف
بعيدا)

رفيف : كده البداية مش عال.. ح تشمت فينا العزل يابن
العتار لكن ولو يعنى فيك يامعروف بتقول كده
بداية الاختبار ورينا بقى يازينة الشطار (تغنى
أغنية تمزج فيها ما بين عواطفها تجاه معروف
وثقتها فى قدرته على الحلم التى ستجد مخرجا
لصديقه كبداية لمركته فى الجزيرة.. مع نهاية
الأغنية يظلم ماحولها ويضاء حول معروف
ومخلف ثانية)

مخلف : ومن ساعتها والدين تراكم عليه وطال انتظارى
لمركب البضائع الجية ومع كل صبحية.. بيعت لى
الشهبندر يسأل فى المركب.. وفين حق الديانة يا
سيد مخلف

معروف : بعد ما كنت عليت وبقالك صيت ؟
مخلوف : رجعت واتحطيت يامعروف
معروف : ولو
مخلوف : يعنى آيه ولو يا معروف
معروف : شغل قلبك يا آخى
مخلوف : قصدك اشغل عقلى ؟
معروف : لا قلبك .. قلبك الملى البسحر نده له .. لبي وطار ..
چيه هنا حقق حلم جليل
مخلوف : برضه أنا مش فاهم
معروف : (غناء) لو قلبك قالك تقدر تخرج منها وتطير
تانى .. ح تطير .. لو قلبك .. شاف فى الضلمة
ضى اتشعيط فيه واطع للنور .
معروف : كده عال .. يبقى اتوكل شوف قلبك بيقولك آيه ..
نفذ له كلامه يامخلوف
مخلوف : ما خلاص ايه قال .. لوح تقرب ودنك من قلبى
راح تسمع .. بيقول معروف .. الحل فى ايده وبس
معروف : أنا صاحب صاحبي قول وأنا انفذ على طول
مخلوف : ح أعلن على كل التجار أنك تاجر كبير

معروف : ليه لا .. ما انا قبلها كنت ملك على كل

الرافيش

مخلوف : سيك من شغل الحناكيش .. أنا بتلكم وبجد على

صورتك دلوقت هنا .. ازاي ح تكون

معروف : (وهو يستعير عمامة مخلوف ويتحرك) تاجر كبير

له كرش خطير قد دكانة الفطير .. بس مش من

عينة التاجر قنزوح .. إللى زيهم هنا كان بيكره

الغنا .. وهد الدنيا على دماغى

مخلوف : خلينا فى المفيد .. ح تقول ايه بقى للتجار

معروف : جاى لى فى الطريق سفينة وخير كتير

مخلوف : ده أنت سبقت خيالى أهه يا جميل

معروف : طب وبعدين ؟

مخلوف : لأ كمل أنت بقى

معروف : لا .. دى تكملها أنت يا حلو

مخلوف : ح تبدأ تعامل التجار فى الجزيرة .. وعلى حس

غناك وخيرك اللى جاى ح ياخدوا ويدوا معاك

وخذ ياسيد معروف لحد مالك مايجيلك .. ودى

هدية ماتردها ودى حاجة مش قد المقام.

معروف : وأنا بقى أخذ واديك.. لأجل ماتعدل حالك..

وتدور تانى اشغالك .. صح ؟

مخلوف : بالظبط يامعروف

معروف : وبعد ماتدور أشغالك وتصلح أحوالك؟

مخلوف : ايه اللي جه فى بالك؟ دى مش نصباية

يامعروف. كل اللي خدته ح اسده.. وكل من له

مال ح أردده.. (صمت ومعروف يتحرك) ايه..

بتفكر فى ايه؟ رافض ولا أيه.. ده كلام قلبى

وصدقته

معروف : كلم تانى قلبك.. بحلق جواد.. لو مش ناوى على

الخير بصحيح.. ح تعلق معاك ومعايا.. وهنا ناس

مابيتفهموش.. مادام لايبعرفوا لون ولا مغنى

يعنى ح تقلب ضلعة معاهم ونضيع

مخلوف : بوجودك مايجيش أبداً غير الخير

معروف : طيب اللي شاغلنى الوقت بقى ازاي ح يصدقوا

أنى تاجر وفى التجارة قادر وشاطر وماتقوليش

العمة والطرطور.. أنا عايز فعل مضبوط.. طيب

فكر بالراحة معايا.. لحد ما اخليهم فى الدار

يحضروا المطرح.. ويحضروا الهدوم

معروف : من غير ألوان برضه يامخلوف؟

مخلوف : (خارجا) ماهو أنت لو زى أخوك مديون مكانش

يشغلك هنا مغنى .. أو لون

معروف : (وحده يغنى مامعناه) مخلوف اتغير ماعاد

جاسر ولا له جناح.. وكان معايا فى بحر الخيال

سباح.. طب راح ده كله فىن وازاى (رفيف التى

ظهرت مع الغناء تصفق لغنائها)

معروف : أنت هنا يا جنيه ؟

رفيف : يمكن تحتاج لى

معروف : احتاج لك فى ايه بعد اللي عملتيه؟ وأديها بدأت

بالفلس

رفيف : لو حبيت خد رأيي.. مش أنت وصلت معاه

لسؤال.. ازاي يصدق التجار أنك حقيقى تاجر

فى التجارة قادر وشاطر

معروف : عايزه صحيح تخدميني

رفيف : أوامر يانور عيني

معروف : تريحينى وتسببيني .. ممكن

رفـفـيـف : اـه .. ما هـي لـسـه فـي بـالـك تـلاقيـها وشاغلـة خـيـالـك

مـعـرـوف : هـيـه مـين يـا بـت ؟

رفـفـيـف : بـنت جـعـيـوب التـخـين

مـعـرـوف : جـعـيـوب التـخـين دـه مـين ؟

رفـفـيـف : اـبـو قـنـوت القـلـوب يـا مـعـرـوف .. بـس اـن شـفـت لـي

و ش بـعـد كـدـه

مـعـرـوف : دـه الـلي اـذا عـايرـه بـقـي .. ايه رايـك

رفـفـيـف : خـلاص اـتـلـقـي و عـمـدك .. و لـو غـرـقـت هـنـا مـش ح

ا ساعـدك

(دويتو غنائى بهذا المعنى ينهى المشهد)

إفـلـام

اللوحة السادسة

(إضاءة مسرح سحرى،
عصفوران من العرائس
يغنيان كل على فرع شجرة
يحكيان عن العالم لو خلا من
الغناء .. فخلا من الحب ثم
تهبط رفيف فى المقدمة)

رفيف : وادينى جيت لك فى قصر ك يا أميرة قوت .. بابنت
جعيوب الهلפות (تبدأ إضاءة جناح قوت فى
ركن من المسرح .. حيث الأميرة وروية الوصيفة
ويتلاشى العصفوران ويستمر الغناء عن بعد)
عايزه أعرف ايه فيكى غير غناكى .. لفت نظر
معروف .. ما أنا عارفاكى وحافظاكى زى
ماعارفه أبو كرش أبوكى (ثم تقترب تتسمع)

قـوت : سامعة الطير بيغرد ياروية.. عمره ماغرد زى

النوبة

روية : ربنا يستر والوزير برجاس.. مايسمعوش.. يؤمر

بشنقه مايستناش

قـوت : يشنق الطير عشان الغناء ياروية؟!

روية : ماهو الفرمان عندنا بيمنع الغنا

قـوت : مين من حقه يمنع فى الدنيا الغنا؟

روية : تانى يامولاتى.. ماقلنا بلاش

قـوت : وليه؟ ليه الالوان هنا ممنوعة.. وليه ما أشوفش

الناس.. وليه برجاس

روية : (تقاطعها) مولاتى فى عرضك كده ح نضيع ..

ده عهد ماين مولانا الملك جعبوب.. وملك ملوك

الجان.. عهد له خمسين فرمان

قـوت : طب مالهم بينا .. ليه يتحكموا فينا بخمسين

فرمان.. جزيرتنا وحرين فيها.. وملكها أبويا

بيحكمها يتحكموا ليه همه ياروية

(يستمر الحوار بينهما.. وتتفقر رفيف للمقدمة)

رفيف : اهو ده اللى عاجبنى فيكى يابنت يا قوت.. عيانه..

وعلييلة لكن بكل رجالة الجزيرة بما فيها أبوكى
جعبوب الهلفوت وحدك بتقولى ليه
زى معروف الإسكافى حبيبى.. مع فقره وقلة
حيلته.. ماقدرش حد يمنعه يحلم أو يغنى..
وعشان كده حبيته وحبينى

صوت : (يعلن) مولانا الملك جعبوب
رفيف : (يعلن) الملك الهلفوت ح يفوت.. وسع وسع
(يدخل فى طفولة مهرولا يهز كرشه)

بنتى حبيبتى

رفيف : حاسب على كرشك ح يقع ياجدع
جعبوب : خرجتى واتفرجتى يا حبيبتى؟
قوت : وياريت ماخرجت ولا اتفرجت
جعبوب : (فى هلع) فى أية يارويه؟ قوت ليه مكروية؟
قوت : دلوقت خلاص فاض بيه.. لازم أفهم أية حواليه..
وليه وازاى ما أعرفش جواب عن شىء
جعبوب : (يصرخ) هاتولى الوزير برجاس.. برجاس (ثم
لروية) رجعت تسأل تانى؟
برجاس : (يدخل) مولاي الملك جعبوب

جعوب : (هامسا) الحقنى يا برجاس.. قوت رجعت تسال
من تانى

برجاس : عفو يا مولاي كده خطر وهلاك.. وأنا مسئول
وياك.. عن أمن الجزيرة

رفيف : وأمنها بيضيع بسؤال

برجاس : ممنوع يا مولاتي أى سؤال.. من غير فصال

قوت : الاسئلة جوايا ومش قادرة أمنعها.. كل شىء
حواليه بيقول ليه وازى؟ طلب أعمل ايه؟

برجاس : دى معاهدة واتفاق مع مملكة الجان.. ممنوع
ممنوع

قوت : ملعون أى اتفاق.. ملعون الجان.. ده شىء يجيب
الجان

جعوب : استر يارب استر.. بنتى حبيبتى فى عرضك كده
غلط خالص .. مش حلو خالص.. بخوف خالص

قوت : خايف من آيه يا والدى؟ ده أنت الملك وكبير
الناس

جعوب : لا بيدى ولا بكيفى يا قوت.. يا إما أوافق أو نموت

برجاس : وكده مفروض يا أميرة تخافى عليه وتخافى على

ناس الجزيرة.. تخافى على نفسك.. الجن لو حد
خالف مننا فرمان فى المعاهدة
قوت : يعملوا أيه فينا.. طب أنا بخالف وأسأل أهه..
يالله يورونى
رفيف : هایل يابنت ياقوت.. إنشا الله فيها موت
برجاس : مولای ده شىء لازم يكون له حد
قوت : يبقى أعرف رد.. ليه ممنوع الغنا.. ليه ممنوع
الألوان.. ليه ممنوع يشوفونى وأشوفهم وليه
ممنوع الناس تضحك أو تحكى حكاوى.. ليه
ممنوع الحياة (برق ورعد وصوت رياح)
برجاس : شايف يامولای النتيجة.. برق ورعد
جعبوب : كده برضه ياقوت.. فتحتى علينا باب النار يا
حبيبتى ح تضيعينا يابنتى
برجاس : قولى يا أميرة توبة
رفيف : ماتقوليش ياقوت
قوت : مش ح أقول
جعبوب : قولى يا حبيبتى توبة من دى النوبة قولى لأجل
خاطر أبوكى

رفيف : ماتقوليش ملعون ابوكى

قوت : مش ح أقول

(يشدت البرق والرعد ويظلم المسرح ثم يضاء)

حول الجنى هدير ثم تظهر على بعد منه رفيف)

رفيف : ايه اللى جابك هنا يا هدير.. مش اتفقنا لا ح

تتدخل ضد معروف ولا أنا ح أساعد معروف

هدير : مش جاي يا أميرة عشان معروف.. جاي عشان

اللعيبة الاثيمة.. بنت جعوب الغبي.. شتمت

ناسك وأهلك يا أميرة.. وعصيت أوامرنا فى

الجزيرة.. وانتى واقفه تسمعى مبسوطه بتهلى

رفيف : طبعاً مبسوطه، وزيرهم الملعون شبك وعميله

تشبه عميلك ويا عجائز البحر.. خدام عند أبويا

وعندك يستاهل اللى عملته فيه

هدير : يعنى موافقه على العصيان

رفيف : بطل يا هدير.. مش هيه هدفك.. هدفك معروف..

لما لقيته اندار و ح ينجح و خياله ومعناه ح يواجه

استيعادكم للناس.. قلت تولع حواليه الجزيرة..

حتى لو كانت الضحية هيه الأميرة صح كلامى

ياحلو؟

هدير : كلامى دلوقت يا أميرة مش معاك لكن فى البحر
هناك

رفيف : ماشى ياوزير ياحقير.. خليك بقى هنا وانده
خدامك.. واديله أوامرك التافهة اللى شبيهك
ومعادنا فى نهاية الجولة وح تشوف (تختفى)

هدير : (يصيح) برجاس
(يضاء حول برجاس وخلفية من قصره)

برجاس : عارف ح تقول آيه ياوزير الجان
هدير : خلاص يابرجاس؟ فقدت سيطرتك على جعبوب
الهايف وبنته العيانه .. تحب نشوف غيرك..
ونقولك كده كتر خيرك

برجاس : صبرك ياوزير هدير.. من غير زئير وهدير دى
مجرد عيله لاتاهش ولاتنش .. ذبابة ياوزير
وتطير..

هدير : بعد ما قالت ليه واتناولت ع الجان.. ممكن
كلمتها تخرج بره القصر.. ولو خرجت ح تقضى
عليك.. ح تغلت الجزيرة من أيدينا وأيديك..

برجاس : ح نخوفها يا هدير.. وتكش بكلمة منى تكش
هدير : لا ح تطلع الدراويش بالتهديد والوعيد.. وقصاد
القصر وخواليه.. لا يبتلوا هيصة ولا تهليل..
تفضل كده ولحد الصبح صاحبة ماتتاهم.. مفهوم
يا برجاس؟

برجاس : ولو إنها مش مستقلة ده كله يا وزير الجان.. لكن
ح يتم.. واضمن كل شىء ح يظل في إيدى
هدير : وايدكم

بس بعد ده لو نطقت . راح ييجى غيرك يتصرف
يا برجاس.. وبالمنااسبة عايزك تاخد بالك من زى
غريب ينزل جزيرة النعاس

برجاس : وضع يا هدير.. ايه تقصد بغريب

هدير : من غير تفصيل.. خذ بالك قلت وبيس.. فاهم؟

إظلام

ص رفيف : (فى الظلمة) روح جك خيبة أنت وهو ياهدير..

صبرك تشوف.. معروف راح يفسد كل ده ويهده
على دماغكم.. اسخن يامعروف.. حرك قلبك
ياحبيبي وطير.. الدون طمعان تخسر وأخسر
وياك وساعتها آل يتجوزنى.. أنا يابن آل
(تصيح) يالله يامعروف ورينى.. ازاي ح تكسر
الوزير الحقير (يضاء حول سوق المدينة.. حيث
تشهد فى مقبلة المسرح معروف ومخلف فى
ثياب لتجار داخل وكالة مخلف)

معروف : قبل ما أقولك على الحل اللي جابه خيالى.. ح

احكيلك عن حلم جميل

مخلف : وده وقت حلم يامعروف الشهبندر لسه قصادك

باعت يطلب حق الناس

معروف : حلمت حلم بديع.. أن الجزيرة دى كلها مناديل..

متلونة وبألف لون حتى اللون الأصفر الملعون..

بقى وسطها أجمل لون

مخلف : عايزهم يجيبولك عسكرى ويجرك تانى؟ ولا عايز

تزود جنانى.. خليك فى مصيبتى وقول ح تعمل ايه

معروف : خلاص يا سيدى خلينا فى اللى يدلهم على ابنى
تاجر كبير زيهم واكبر كمان منهم.. أول هام..
أنادى خيالهم أصحيه بعد ما مات من قلة المغنى
والضحك والالوان

مخلوف : وإزاي تصحى خيالهم؟ وده ح يقيدنى بايه؟

معروف : لما أعمل زى أبويا زمان

مخلوف : عن أمين الوراق

معروف : لما بقى رجال وصال وجال.. كان يصرف وكاته
أمير.. طائر بيطير.. حتى لو كان اللى فى ايده
آخر الدنانير

مخلوف : يعنى آيه؟ تقصد آيه؟

معروف : يعنى عايز فى إيدى دنانير .. دنانير كتير بتطير

مخلوف : أنا واقع محتاج رسال.. وأنت تقول هات دنانير

وكتير يامعروف.. ده أنا كل اللى باقى لى

معروف : (مقاطعا) آخر ما معاك هاته من غير لت كتير
حضرهم وماتسالش

مخلوف : إزاي ما اسالش كمان

معروف : اللى عايز مايخفش واللى خايف مايعرش .. جمد

قلبك وارمى روحك فى البحر

مخلوف : ده كلام كان فى شبابنا لما رميتنى على الترحال

ويكرره تانى يامخلوف

معروف : الأمر لله بقى ونشوف

مخلوف : يبقى اتصرف حالا. روح هات اللي معاك

معروف : حاضر يامولانا الأمير.. تيجى الدنانير (يظهر)

مخلوف : موكب الدراويش فى مدخل السوق فى حالة نداء

أقرب إلى الندابين وهم يطرقون على علب صفيح

فى ضجة بالغة)

ك دراويش : ياناس يا أهل جزيرة النعاس

الدراويش : عاس .. عاس .. عاس .. عاس .. عاس

الكبير : يا انكدر المتاعيس وأتعبس ناس

الدراويش : ناس .. ناس .. ناس .. ناس .. ناس

معروف : إيه المقاطيع دول كمان.. بيكملوا حاله الجنان؟

مخلوف : دول دراويش التكية وماتسالش فى حاجة تانى..

هنا ممنوع الأسئلة قلت يامعروف

معروف : زى المغنى والالوان ممنوع

الكبير : (وقد اقتربوا) ياللى وجودكم عدم

الدرأویش : عدم.. عدم.. عدم

الكبير : وأخرتكم ندم

الدرأویش : ندم.. ندم.. ندم (ثم يكررون خلفه الفرمان)

الكبير : م اليوم عليكم اتحكم.. لكل فرمان صدر ماعاد

لعصيانه حكم موت.. أو سجن أو تجريس.. لكن

عقابه يكون بايد الجان

الدرأویش : (يكررون)

معروف : جن لما يلهفك ياشيخ انت وهمة

الكبير : وبامرهم.. تنشق الأرض وتبلعه أو يتمسخ فى

موضعه.. أو يتخطف من مضجعه

مخلوف : ح أشوف الفلوس واجيلك ومالكش دعوة باللى

بتسمعه هنا وتشوفه (مع خروج مخلوف تظهر

رفيف)

رفيف : شفت الدراویش

معروف : هو أنتى البركة فيكى.. بفضلك شفت اللى

ماشفتوش

رفيف : خايف يا معروف ونفسك تهرب ؟

معروف : سيبنى اشوف الى منتظرنى فى جزيرة حالها

مجنى

رفيف : تحب امشيك من هنا يا معروف وفى غمضة عين؟

معروف : قلتى امشيك

رفيف : ولأبعد حته أوديك

معروف : (بعد صمت) لا .. مش عايز امشى الوقت

رفيف : طب افكر أنك قلت لأ .. ومالكش بعدها عندى أى حق

معروف : ما قدرش أسيب مخلوف صاحب .. مهمتى

رفيف : وح تنقذه من ورطته

معروف : مادام قلبى فالح اقدر .. ببقى ح اقدر

رفيف : ازاي ح تقدر؟

معروف : (يصيح فيها) يوهه.. مش شغلك وسببى اشوف اللى ورايا بقى غورى

رفيف : بطل تصرخ فيه.. وتقبح فى الرد عليه .. بس لما

تتكلم عنها هيه يامعروف تبقى مؤدب ولطيف

معروف : هيه مين يا أختى

رفيف : اللى دراويش التكية ماشية يخوفوها بالكلام

معروف : يخوفوها بالكلام ؟

رفيف : بس لعلك مش هيه المقصودة لكن أنت المقصود

معروف : لامش ناقص بقى .. كفاية عليه فزورة .. مخلوف

دلوقت .. واتفضلى بقى وسببىنى لأجل اقدر

افكر .. واطير بخيالى وادبر .. حلى عن سمايا يا

جنية

رفيف : طب أنا برضه مستتية «تختفى مع ظهور مخلوف

قادمة بالاكياس»

مخلوف : وادى ياسيدى كل اللى خيلتى جيته .. مافى شىء

سبته

معروف : كام كيس نول يا جميل ؟

مخلوف : ستة يامعروف

معروف : طب هات نول .. والباقى خليه وياك

مخلوف : فى توجس معروف أنا فى عرضك .. أنت عارف

ايه ح تعمل بصحيح ؟ ناوى تطلعنى من الخبة

ولاح تكمل عليه ؟

(اظلام ويضاء حول جناح قوت وسط المسرح

حيث ينور حولها فى المنطقة المظلمة الدراويش

بالنداءات السابقة.. ويستمر ذلك وهي تدور فى
ارتباك.. مع اضاءة بالمقدمة حول روية والوزير
برجاس» «ال دراويش فى نداءاتهم السابقة
مستمرين)

برجاس : اديكى سامعه معاها كلام دراويش التكية..

لوسألت تانى ح تروحي معاها فى شربة مية

روية : وذنباها أيه روية.. لو هيه سألت تانى توبة

برجاس : ركبها الرعب فى كل لحظة ..ماتهمديش ولا
لحظة

روية : ما أنا طول عمري بخوفها.. والخوف

ماحاشهاش.. نصحتنى يفضل كده حالها

بعبطها وهبلها.. لكن مرة واحدة يطلع سؤالها

وعقلها ينور طب اعمل ايه؟

برجاس : تكملى دورهم (يصيح بالدراويش) الهممة

يادراويش التكية

(اظلام حول روية والوزير وتصاعد أكثر

ضجيجهم وتزداد توتر قوت)

قوت : كفاية يا دراويش.. كفاية وحشية

روية : (تدخل) مالك يامولاتي

قوت : الدراويش ياروية، بيهددوني بالجان

روية : مفيش دراويش ياستي.. ولا سامعه شيء في المكان

قوت : اراي وهمه حوالين القصر.. صوتهم ييزعق في

المكان.. اللي ح يعصى الجان .. ح تنشق

الأرض تبلعه.. أو يتمسخ في موضعه.. أو

يتخلف من مضجعه

روية : ستي سلامتك

قوت : شفتي .. الأرض انفتحت تحتي

روية : اسم الله عليكى ياستي

قوت : حد يلحقني .. أنا خلاص رحت. الأرض بلعتني

غصت.. مت.. مت.. مت

روية : فين بس غصتي.. ما أنت قصادي ياستي

قوت : يعني الأرض مانشقتش؟

روية : ولا حاجة تحنك بتهش ولا تنش

قوت : لكن قالوا .. اللي يخالف الأرض ح تبلعه

روية : وهو أنتي غلطتي تاني ياستي

قوت : سألت وقالوا ليه تسالي

روية : ماهو الكلام بقى من أول وجديد.. المهم الوقت
لأنقول ولانعيد

قوت : بس أنا مش قادرة امنعها

روية : هيه ايه ديه؟

قوت : اسئلة لسه عايزة اطلعها.. وعشان كده مرعوبة.. مرعوبة

روية : لافى عرضك بقى توبة دى آخر فرصة.. يا أميرة
قوت بعدها هلاك أو موت

قوت : مش قادرة ياروية.. الأسئلة جوايا ومش قادرة امنعها

كده تضيعى لأ ده خلاص.. كده ضععتى يا أميرة

روية : وضيعتى الجزيرة.. كده ضععتى يا أميرة.. كده
ضععتى يا أميرة

(يتصاعد نداءات الدراويش وصياحهم حولهما)

وهى تنكمش فى حضن روية)

الدراويش : يبقى الأرض رباح تنشق وتبلعك.. وح تتمسحى
فى موضعك.. وح تتخطفى فى مضجعتك..

(يكررون فى تصاعد حتى ينتهى المشهد بصرخة

مدوية من قوت ثم)

إظلام

السوق

(السوق على نظام ديكورات
على محور تدور وتتوالى
مشاهد السوق .. تبدأ بديكور
وكالة الشهبندر عباس ومعه
التاجران حواس ونواس)

حواس : أهو القاضى فضل مستتنى لحد الظهر والسيد
مخلوف ماجاش ياشهبندر عباس (الدرائيش
عن بعد قادمين)

نواس : يعنى مخلوف ح يماطل تانى يا حواس .. دوخينى
يالمنة

عباس : صبرك ياسيد نواس .. صبرك ياسيد عباس

حواس : من وقف حال لوقف حال .. ليه ده كله ياشهبندر
ليه ؟

عساس : أنت قلت ليه ؟

حواس : مش قصدى .. طلعت كده تفييىص

عساس : خليك حريص.. واديك سامع كلام الدراويش

نواس : ما عايش فيها حكم سجن.. لكن عقاب من

الجن.. أهو ده اللي ناقص وتكمل (يصل

الدراويش وهم ينادون).

حواس : طب أيه العمل يا شهيد مع مخلوف

عساس : تانى .. ماده برضة سؤال؟

حواس : طب نعمل ايه أmaal.. نطلب حقنا بالإشارة

نواس : اسكت دول وصلم هنا.. (يصل الدراويش

بالنداءات)

عساس : ووقفوا عندنا

حواس : يمكن سمعوني ؟

عساس : ارمى لهم المعلوم .. خف يا عساس تعوم (يرمى

إليهم كيس صغيرا فينصرفون به)

الكبير : (كبير الدراويش) (يتابع) وكل فرمان صدر

ماعاد لعصيانه حلم موت أو سجن.. لكن عقابه

بايد الجن.. (يستدير الديكور .. لنواجه معروف

ومخلوف يمران بديوان الشحاتين حيث جلس

شحاتون تحت لافتة الديوان)

مخلوف : مد بسرعة يامعروف.. القاضى مستنى هناك عند

الشهبندر من بدرى

معروف : معقول .. الشحاتين فى الجزيرة لهم ديوان

مخلوف : ولهم نقيب كمان.. بقى اتاخرنا

معروف : طب بس نتعرف ع السادة الشحاتين

مخلوف : أنا جايبك نتعرف على التجار المليانيين.. مش

الشحاتين

معروف : بس دول مش مادين الايديين

مخلوف : دول مش بيمدوا الايديين

معروف : آمال ازاي شحاتين ؟

مخلوف : بلاش تقول ازاي.. هنا كل واحد له فى الشهر

درهمين.. واللى بيجمع ويفرق نقيب الشحاتين

معروف : بس دول كتير يا مخلوف

مخلوف : زى دروايش التكيه.. ومد خلصنى يامعروف

(معروف يفتح الكيس) أنت

معروف : أنت يا والدى تعالى

شحاذا : (بكبرياء) تعالى أنت عندى
معروف : (يرمى إليه بدنائير) طب خد دول منى
مخلوف : (يصيح) ايه ده يامعروف
معروف : ح تشوف
الشحاذا : اتمنظر ورمالى درهمين.. سلمهم لنقييب
الشحاتين
شحاذا : (يصرخ) دول دينارين.. ودهب ياحزين
شحاذاين : دهب .. ودينارين.. (الشحاذون يقومون فى
هجوم تجاه زميلهم فيرمى إليهم معروف بكم من
الدنائير تطير فى الهواء وهم يلتقطونها وينكفئون
فى كل اتجاه)
مخلوف : ايه ده اللى بتعمله.. ح تفسد الأمر من أوله
معروف : أمر أيه؟ اللى افسده أو أعدله.. الحال خراب من
أوله.. بلد لاتعرف مغنى ولا ألوان.. ولاضحك
ولاسامر.. بلد عميان.
مخلوف : ترمى الذهب للشحاتين .. ده جنان
معروف : وهيه فعلا محتاجة الجنان
مخلوف : ماهو لو شديت بزيادة ح يفتكروك محتال

معروف : ماهو كله خيال فى خيال.. وأنا عمري يامخلوف
فى الخيال رجال (تتغير الإضاءة لتشمل معروف
ومخلوف كأنما يتخيل الغناء ويهبط فى الخلفية
قمر كبير تجلس فوقه رفيف)

غناء : (صياغة غنائية للمنولوج التالى)

معروف : حتى فى دكان الإسكافى كنت خيال رجال
موال .. خيال.. وكتاب مفتوح حكياته كتار..
واحد هناك كان فاهم غيرك لما رجلت وماحد هنا
فاهم غير الجنيه

رفيف : (غناء) وأخيراً اعترف بيه.. معروف اعترف
بالجنية يامخلوف

معروف : مفروض يامخلوف تفهمنى لأجل ماتخرج من
الورطة.. وزى مايساعدك تساعدنى.. ترجع زى
زمان مخلوف.. أفرد جناحاتك ويايا على الجزيرة
الميتة وياالله نظير (ينتهى الغناء ويعود المشهد
مخلوف ومعروف)

مخلوف : إذا كانوا هناك فى بلدنا مافهموكش يامعروف..
عايزين هنا الاموات يفهموا؟

معروف : بينا نقابل الأموات لأجل يقوموا من الموت..
«اظلام ويستدير الديكور عن وكالة الشهبندر
حيث يقف الشهبندر عساس ومعه حواس ونواس
ويقبل نحوهم ومخلوف»

مخلوف : السلام الحار.. على الشهبندر وإخواني التجار
نواس : سلام وحر .. آخر النهار؟
عساس : القاضي يا سيد مخلوف كان في انتظار من أول
النهار

مخلوف : أحب أقدم لكم الأول السيد معروف
حواس : فات كثير ع المعاد .. وأنت حاسس بالكساد
نواس : والمهم اللي زاد .. مع كده ولا سائل .. وفي كل
مرة تحايل

معروف : بالراحة يا سادة على السيد مخلوف
حواس : وده مين كمان
عساس : ده اللي جاي مع السفينة اللي كنت منتظرها؟
مخلوف : لسه ماوصلتش السفينة.. ده مجرد ضيف علينا
نواس : مدام ماجتش السفينة يبقى اتصرف وياه
ياشهبندر.. ياحقنا .. ياللي ح يحكم بيه القاضي

تجريس وسجن

عساس : يا سادة نسمع للراجل يمكن عنده جديد

حواس : ما عادش فيها سمع ولا انتظار

نواس : يغطس ويقب يجيب حق التجار

(الشحاذ يأتى مهرولا وخلفه جيش الشحاذين)

شحاذ : علمهم ياسيد الناس ازاي كرم السادة

آخر : وولاد الاصل الكرما

حواس : مش ناقصينكم

شحاذ : ده رمالنا ذهب بييجى ميت دينار

آخر : أكثر يا حمار

آخر : تسلم ياسيد التجار.. ادينا كمان فضلة خيرك

عساس : أنت اديتهم دنانير حسنه.. دنانير ذهب؟

معروف : مش حسنه .. لكن حب كبير التجار

شحاذ : ادينا شوية حب

آخر : يسترك يارب

معروف : بالراحة وكله ح ياخذ حب.. الخير كتير والحب

أكثر

مخلوف : (يصح) معروف ياسيد .. معروف

معروف : (وهو مازال يرمى) معقول ياسيد مخلوف
تختلفوا سوا على كام ألف دينار.. وقصادكم هنا
مساكين للحب منكم محتاجين

حواس : مين ده ياسيد مخلوف

مخلوف : (فى غيظ) ما أنا قلت السيد .. معروف.. تاجر
نواس : يا أخى وضع.. ده مش مجرد تاجر.. ده أكيد
شهنذر تاجر

معروف : (يكمل) أرض النعام.. شهنذر أرض النعام (ثم
مخاطبا الشحاذين) معلى يا أحبابى خلص
الوقت جرابى.. لو كنت عملت حسابى كنت جبت
لكل واحد جراب بس اصبروا لحد أول سفينة
ماتوصل بالذهب وبالحبوب وبالثياب.

عساس : (يخرج كيسا على الفور) تحت أمرك الجراب

معروف : (يصيح ويرمى) وأدى كمان جراب تحت الحساب
مخلوف : (يصيح وسط ضجة الشحاذين وتهليل التجار
وضحكات معروف) يادى الخراب.. يادى الخراب

نهاية القسم الأول

القسم الثاني

اللوحة السابعة

(مقدمة غنائية لحاشية الملك
خوف بقيادة هدير تتحدث عن
عظمته وسطوته على عالم
الإنس.. وتنذر الجزيرة بما
فعلته قوت من عصيانه)

الحاجب : (يعلن قاطعا الغناء) وصلت يامولاي الأميرة

رفيف

رفيف : والدى الملك خوف.. دلوقت جيت لك أواجه الوزير
هدير.. باللى عمله مع المسكينة قوت بنت
الهللوت.. زى ما بيرتب دلوقت لمعروف
الإسكافى..

هدير : (يصيح) قصدك المحتال

رفيف : مين هو بالظبط المحتال ياوزير ؟

هدير : الإسكافى الحقير

رفيف : عارف أنت كويس.. مين هوه الحقيق ياوزير
حوف : معروف راح للتجار يارفيف.. يبقى مش محتال
ازاى؟

هدير : وح ينهب منهم يامولاي.. أموال.. أموال.. محتال
كذاب وحرامى .. كذب ادعى أنه شهبندر وله
سفن جواله فى البحار.. وهو مجرد جربوع
صرصار

رفيف : سكت خدامك الجعجا ع ده ياوالدى وفهمنى ايه
شان ده باتفاقي معاك؟ الاتفاق نسيب معروف
فوق الجزيرة.. ونشوف حاله عليها.. ح يضيع
فيها.. ولا ح يشكل ويغير حالها وقوانينها
لاح يغير فيها.. ولا ح يقدر على قوانينها.. اللى
هدير : ماتتيز .. واللى يهزها يدفع عمره زى قوت بنت
جعبوب الهلفوت

رفيف : أه .. وعشان كده رحت سبقت .. شعلت حكاية
قوت ياوزير علشان تثبت لعبه القوانين.. ويبقى
حصار حوالين معروف.. ولا يعرف يتحرك منه..
حوف : إذا كان على قوت بنت الهلفوت قدى بنت ملعونة

عاصية لقوانيننا كاسرة

هدير : وعقابها مالوش دعوة بمعروف يامولاي خوف
رفيف : لا له ياخفيف.. علشانك خايف ينجح بدون تغيير
القوانين

هدير : مولاي كده انتهت اللعبة.. الأميرة رفيف قدامك
هنا قالت.. معروف الإسكافي ح يغير الجزيرة..
الإسكافي الغلبان ح يطلع اقوى من الجان

رفيف : وكلامي ماتتكروش.. وعجايز البحر قالوا وحذروا
فعلا من معروف.. ولسه ح يتحقق

حوف : لأ.. ثبت أنه مجرد محتال.. يعنى أفعاله فاشوش
واللعبة كده باخت

رفيف : لسه ياولدى ماباختش .. اللعبة ماخلصتش

هدير : رغم أنها قامت على الاحتيال؟

رفيف : وأنت بتعمل ايه غير الاحتيال ياهدير

حوف : بتقولى ايه رفيف! وزيرى محتال؟

هدير : ده كلام يا مولاي سخيف.. معناه إيه جاللتك

رفيف : مالکش دعوة بجاللته يا ألبان.. الأميرة

المسكينة ياولدى فتحت عينها .. اللى ربنا

خلفهم فيها بصيت حواليتها وسألت أياه اللي
بيحصل؟ جبت أنت يا هدير وطلعت لها الدجالين
اللى تبع خدامكم برجاس.. عشان يرعبوها..
ويمكن تموت فيها.. مش ده اسمه احتيال..
وندالة أندال

هدير : والله عال.. قوة الجن احتيال يامولاي

حوف : قوتنا وسطوتنا وسط المكان والزمان فى المية
وفى النيران تقولى عليها احتيال يارفيف؟ ده
تجاوز مخيف

رفيف : بتسخر قوتنا ياوالدى فى ايه؟ والبنى آدمين
فوق الجزيرة تتحكم فيهم ليه ؟

هدير : رد عليها أنت يامولاي

حوف : علشان احنا الاقوى .. احنا الجان

رفيف : يبقى استنى ياولدى لما اثبت أن فيه الأقوى من
الجان.. باللى ح يعمله معروف

حوف : فاهمة أنتى كده بتعملى أياه؟ كده انتى مصره
بتتحدى الجان وملك الجان تتحدى أبوكى حوف

رفيف : كده أنا بمنع ملعون يتحكم فيه لما تجوزه ليه..

ويستولى بعدها على عرشك وأنت تطير.. تبقى
ملك طرايطير

حـوف : أنا ملك طرايطير!!

رفـيف : كده بمنع أن الحقيقة تضيع منى ومنك ولا أنت
يابويا عايز تحكم ومش عايز تعرف حقيقتك
واللى بيجرى حواليك ووراك؟

حـوف : رفيف آيه اللى جراك.. ايه شغلت مخك وخيالك

هـدير : الأميرة يامولاي عدت كل الحدود.. ولو عجائز
البحر سمعوها

رفـيف : اسمع أنت ياوزير ياحقير.. الاتفاق.. أنا
ماخالفتوش لاساعدت معروف ولاهوہ طلب منى
أساعده.. واللعبه لسه بتلعبها.. عايز ترجع فى
كلامك يامولاي قول وأنت اللى طول عمرك عدل
على طول

حـوف : أنا ماارجعش فى كلمة اقولها يابنت حوف

رفـيف : يبقى ياوالدى اللعبه تكملها.. لأجل الحقيقة تبان
وتعرف حقيقة الجبان.. وتعرف حدود قوتنا..
وحقيقة مملكتنا .

حـوف : (وهو يتصرف غاضبا) خلصنا يا بنت حوف ح

نكمل اللعبة مع معروف

رفـيف : ح نكمل ياوزير يا حقيير.. وأنت يا حاشية

ياتعبانة. يملوا الهتافات وأبوكو السقامات

(تمرق صاعدة لأعلى.. والحاشية تعود إلى ختام

غنائي غاضب.. يقوده هدير ضد الإنس وضد

معروف وقوت) .

إظلام

(صحن منزل مخلوف)
(مخلوف يخلع عباءته فى
ضيق ويرمى بها ومعرّوف
يتأمله)

مخلوف : تضيع بقى مالى على الشحاتين وتأخذ لهم من
التجار كمان.. كان معروف تتكلم ويا التجار فى
الموضوع يا معروف !

معرّوف : ح تشوف.. ح ييجوا لحدك يخبطوا وراك
مخلوف : فكر؟ فكر ح تتحل يا معروف بطريقتك دى !!
حضر نفسك وبلاش تانى ؟!

معرّوف : ما أنا قلت يجولك.. والقاضى معاهم ح يزورك..
معرّوف : حضر عزومة كبيرة وبسرعة يا شاطر.. بلغ
الطحانين يولعوا الكوانين .

مخلوف : مزين؟! ده اللى باقى كام دينار.. ويعدها ع
الحصيرة.. والبركة فى شحاتين الجزيرة .

معرّوف : فعلا.. البركة فى شحاتين الجزيرة.. (يرمى إليه
كيسا) خد.. أدى كيس فضل منه اللى دفعه

التجار.. جهز بسرعة العزومة .

مخلوف : (صارخاً) لما اشوف آخرتها ايه

رفيف : (تطير) معروف

معروف : رفيف

رفيف : أخيراً قلت اسمى (بضيق) قال اسمى يابويا

معروف : بس متغاف منك.. خدتينى وسوحتينى من غير

إنذار ولا حتى إشارة

رفيف : أصل راهنت عليك يا حبيبى وقلت بلاش أضيع

وقت

معروف : راهنتى عليه؟ راهنتى عليه ده ايه !!

رفيف : بس رهانى ح يطلع فى محله.. من غير ما

اضطر أساعدك ولا أرتب وياك مع انى أقدر

بإشارة اجيب الف سفينة زى اللى قلت عليها

للتجار

معروف : انا مش محتاج.. ولو الحكاية صحيح اموال زى

ما فاهم مخلوف يبقى انا محتال.. وانا مش

محتال

رفيف : الله.. الله.. اهوده اللى مش فاهمه سى خوف

بتاع البحر المسقوف

معروف : وده يطلع مين ده كمان بتاع المسقوف ؟؟

رفيف : خليك بقى فى تسوية.. بص عليه.. دايمًا بتكلمنى
ووشك متدور فى الناحية الثانية.. اوعاك يكون
قلبك مشغول بقوت بنت الهلفوت

معروف : قوت مين دى ؟

رفيف : الأميرة اللى قابلتها فى السوق.. ح تقوللى
نسيت !!

معروف : ياه.. دى عيانه ودبلانة.. مسكينة.. عايشة فى
جبانة

رفيف : يصيح؟ يعنى انت يا معروف مش شايف غيرى

معروف : أنا راجل متجوز عيب.. ان مش شايف غيرك دى

رفيف : يعنى انت مش حاسس بيه؟ ولا أنا وحشة
وكلكوعه

معروف : (يتأملها) لا بالعكس

رفيف : (يصرخ) لا بالعكس؟؟ (تكرر وهى ترقص) قال

بالعكس قال بالعكس قال بالعكس.. حس بيه

وشاف جمالى

(تتعارف فى غناء قصير..)

يقطعه معروف بصيحة منه)

معروف : اتحشمى بقى حبة يا جنية

رفيف : بعد ده كله وتشخط فيه (تبكى)

معروف : طب ماتعيطش.. خلاص.. قلنا ماتعيطش

مخلوف : من دى اللى ما تعيطش !!

معروف : أبدا افنكرت مراتى ساعة ماسبت.. كانت بتعيط

مخلوف : هو انت اتجوزت !؟

معروف : كانت جواز هباب.. وماكانتش بتعيط

مخلوف : طيب وأبويا

رفيف : قفلوا له الدكان

معروف : وطلعونى لص ومجرم

مخلوف : بسأل عن أبويا يا معروف اتلهيت عنه فى خيبتى

معروف : ح ييجى الوقت وترجع له.. وافتح عينيه العميانين

هناك.. زى ما ح افتحها هنا

رفيف : يادى الهنا.. وننتصر انت وأنا.. ونعيش سوا

لبعضنا

معروف : بلاش هبل روحى بقى

رفـيف : ده كلام هبل برضه !!

مـخلوف : هيه الجنيه.. دى تانى معانا الوقت

مـعروف : سيبك من جنانها وخليك بقى فى جنانى بعد

العزومة.. ح نعمل ايه ؟

مـخلوف : تعمل ان.. استر يارب

مـعروف : مطلع ع السوق

إظلام

(يضاء أعلى المسرح حول
فراش قوت ممددة فى سكون
وبجوارها روية وطبيب سمين..
حيث يدخل جعبوب لاهثا)

جعبوب : مالها؟ شفت ايه؟ جرى لبنتى حبيبتي ايه؟ انطق
يا طبيب فنتاس ساكت ليه

فنتاس : الاميرة يا مولاي جعبوب.. مافيتها اى عيوب..
لافى العين ولا فى الإيدين ولا قلبها ولا كبدها ولا
وشها ولا ظهرها

جعبوب : امال ده ايه؟ ساكتة مابتتلقش ليه ؟

قوت : (تهب فى فزع فجأة) ايدي الحقنى بيشدوا ايدي

روية : اسم الله عليكى يابنت سيدى

جعبوب : الحق يا طبيب شوف مالها

قوت : جنى.. هناك واقف مستنى.. شبه برجاس

جعبوب : برجاس

قوت : هود اللى شد إيدي معاها.. لاجل يسلمنى ليهم

جعبوب : مالها .. عقلها ولا ايه اللي جرالها يا فنتاس
فنتاس : لكن يا مولاي عقلها ..
روية : أكيد يا سيدى عقلها .. خلاص يا مولاتى ذهب ..
الجنى راح
قوت : لا .. لا .. راح يرجع تانى .. راجع لأجل يسلمنى
جعبوب : (يمسك بها) بنتى حبيبتي .. اعمل حاجة يا
فنتاس
قوت : والدى .. خلاص .. أنا مش قادرة الجن متربصة
غادرة .. زى ما جانى الحلم .. الحلم .. الحلم
اتصبح غم ترتى فى غيبوبة ثانية
جعبوب : غابت عن وعيها تانى يا طيب
فنتاس : ماعندى حل يا مولاي .. يبقى ماعادش قدامى
غير الناس فى جزيرة النعاس ح الجا ليهم
وخلص
برجاس : (يدخل) وان تكون الناس فى جزيرة النعاس دول
كلهم رعا ع
جعبوب : أى طيب من العامة ينجدنا يا برجاس
برجاس : أى طيب من العامة ح تقل قيمتنا

جعبوب : (يصيح فيه) ايه قيمتنا وايه خيبتنا.. لو راحت
وسايتنا

برجاس : مولاي معروف السبب.. عصانا الجان
جعبوب : ما عاد يهمنى عصيان ولا عاد يهمنى جان وتغور
المعاهدة ويتحرق الفرمان

برجاس : مولاي جعبوب
جعبوب : ملعون أبو جعبوب ان ساب بنته تضيع.. ابقى
راجل وضيع (ثم فى أمر لبرجاس) .. أعلن فى
كل الجزيرة.. ان اللى ح يقدر يشفيها له مكافأة
كبيرة

برجاس : ح ييجى كل الحثالة فى الجزيرة على كل
الجرايع
جعبوب : خلاص.. اللى مايقدرش ح يترمى فى السجن
وتضربوه

برجاس : يعدم يا مولاي فورا
قوت : (تهب ثانية فى صرخة) روية
إظلام

(السوق.. ويتم توالى ديكورات
السوق على محور دائرى يبنى
أن يكون نواس حيث العمال
يكنسون) .

نـواس : (يصيح الغلام برش ماء أمام الوكالة ويرشون)
بسرعة يا غلام.. ورش كمان قدام
حـواس : (يصيح) وصل شهيندر أرض النعاس
(عساس يتقدم لاستقبال معروف ومخلوف اللذين
جاءا فى تؤدة)

مـعروف : عفوا يا سادة لولا خاطركم الوقت ما جينا
وبمشاهدتكم فى العزومة كنا اكتفين
خـلف : أصل معاده الوقت يوصل المينا
نـواس : (يفزع) ايه؟؟ ح ترحل عن اراضينا؟؟ اوعى يا
سيد معروف
مـعروف : لا.. لا يا سادة.. أنا كل غرضى ابعت رسالة مع
أى سفينة.. لأجل ما تستعجل قطعة من سفنى

حواس : (لنواس) بيقولك قطعة يا نواس ؟
معروف : صعب عليه حال الناس هنا .. قلت استعجل
سفينة من سفنى تيجى تنجدهم
نواس : ويا ترى يا سيد معروف فى سفنك دى بضايح
زى بضايعنا اللى جوه هنا
معروف : نشوف الأول يا سيد نواس .. نشوف ايه عندكم

(الشحاذين يقبلون فى اندفاع)

أحدهم : عايزين دناير تانى يا أمير
حواس : هتش .. هتش .. كفاية طمع
معروف : بالراحة عليهم يا سيد حواس .. استقنوني يا
اصحابى المساكين .. سامحنى يارب انا حزين ..
ارضسيهم دول الوقت مدين ؟ .. (ثم يذلف إلى
الداخل .. وعمال التجار يحجزون الشحاذين ..
معروف يقلب فى الأثواب) .

حواس : ايدك وحت على طول .. على احسن توب
معروف : احسن توب (يضحك) اسف يا سيد نواس ده
حرير بيلبسوه الخدم عندى ده غير انه مش
هندى .. ولا رومى ولا عجمى (يرمى بالثوب)

ارميه للشحاتين.. ما يليق بدكانك

نـواس : (يضرب رأسه) الشحاتين!! (الشحاتين يتلقونه
فى ضجة) .

مـعروف : وده ايه.. (ديباج موصلى ؟ يا خسارة مش
موصلى.. اللى راح يوصل.. حقيقى ح يكون
موصلى.. وده تشيله للخدم.. عندك يا سيد
مخلف.. عيب يظهرها فى وكالة السيد نواس) .

نـواس : طب ده شوف كده.. بس بلاش ترمى
مـعروف : (يمزقه) معقول.. تاجر كبير.. أكبر تاجر الجزيرة
فى القماش.. وقماشه أى كلام !

نـواس : (محتجاً) لا يا سيد معروف
مـعروف : عفواً.. دى قلة رزق.. لكن بوعدك بألف صنف ما
شافها السوق تمللى وكالتك كلها
حـواس : يبقى تشرف عندى وتشوف البضاعة.. عندى
الأواني والتحف متلألئة .

مـعروف : (هامساً) بس اوعى تانى ترمى حاجة وخف!
(إظلام ويدور المحور عن وكالة نواس حيث يدخل
معروف ومخلف والتجار) .

حواس : شايف بقى يا شهيندر أرض النعام.. أدى تحف
نواس

معروف : (بدهشة) شايف يا مخلوف هنا تحف؟

مخلوف : (يهمس) بعدين بقى أ

حواس : ما هى قدامك التحف.. مالىه الوكالة يا شهيندر

معروف : (وهو يحمل قارة كبيرة) مستحيل دى تحف

وأوانى دى خامتها طوب محروق.. مدهونة وبدون

نوق.. (ثم يرمى بالفأزة فتتحطم ويصرخ نواس)

حواس : حرام.. دى عندى أحسن شىء

معروف : لا ده تواضع بس يا سيد حواس.. أكيد عندك

كثير.. احسن بكتير يا أمير

مخلوف : خف شويه يا معروف كده زادت

عساس : وازاى تكون التحف يا سيد معروف ؟!

معروف : كل التحف عندى فى كتب.. حافظة لكل نوع..

من التحف بلدة.. ووقت ما صنعوه.. واسم

صناعه.. وفيه كؤوس م الذهب.. من بلاد فارس..

لها كتاب وحدها.. أما الصوانى مطعمة بياقوت

مخلوف : (يهمس) يارب خدنى واموت.. كده ح تكشف

نـواس : صوانى مطعمة بياقوت.. قلت يا سيد معروف !؟
مـعروف : ودى من بلاد حتوت.. لما يكون الصينى أصلى..
يبقى من بلاد الصين
عـساس : كلام ثمين.. خبرة سنين
حـواس : وجايلك فى السفن منه ؟
سفينة واحدة ويش.. جايه بالصينى

نـواس : يا عينى !
مـعروف : (وهو يخرج) أرجوك يا سيد حواس غير شكل
وكالتك وأنا من ناحيتى بديك عهدى تستعين
باللى تحبه من سفينة التحف.. لما ح توصل.. أو
تمر وتشوف بقى وكالة الشهبندر بحالة
عـساس : ادى شوية ذهب محطوط.. حبه زمرد وياقوت
مـعروف : ودى فى الأصل تجارتي.. وفيه سفينة عليها
أفضل ما عندى يارب بس تمر.. بينما تشوف
ونتشرف

(إظلام.. ويستدير ديكور الشهبندر.. حيث يدخل
معروف لاهثا كأنما سوف يغمى عليه ويسمع
صياحات الشحاذين) : «حن علينا يا أمير فين

الدنانير» .

عساس : مالك يا سيد معروف.. حد يجيب عطر بسرعة

مخلوف : اتاثر تانى من منظر الغلاية يا سيد عساس

المنادى : يا ناس يا أهل جزيرة النعاس.. يعلن مولانا

الملك جعيوب عن مرض الأميرة قوت القلوب وكل

من يتقدم لشفا - الأميرة من الجزيرة.. طبيب

نطاس أو عطار.. له مكافأة الفين دينار .

معروف : لا حول الله

عساس : وطبيب القصر فنتاس فين ؟

المنادى : ولعلمكم دام فضلكم يا أهل الجزيرة كلكم.. اللى

يتقدم ويفشل فى الاختبار.. مصيره للسيف

البتر.. يا ناس يا أهل جزيرة النعاس (يكمل مع

دخول الدراويش.. كل ينادى فى اتجاه مختلف).

ك الدراويش: يا ناس يا أهل جزيرة النعاس.. يا أنكد

المتاعيس واتعس ناس.. اليوم حصل.. حادث

خلل. وجه لأميرتكم خبل

معروف : ايه الكلام ده يا شهبندر

عساس : بلاش تسأل أرجوك

مخلوف : (يلكزه) ما تعلقناش ممنوع السؤال ويالله
ك الدراويش: (يكمل) داست على الفرمان برجليها وبعد عملتها
ما في شيء ينجيها ومصيركو وياها العذاب
والذل

معروف : وإزاي أبوها يسمح بكده.. مش أبوها حاكمكم
ملك الجزيرة ؟

مخلوف : تاني ح تسال يا معروف.. شيلوه معايا
عساس : جره بسرعة وامشي ما سبق مخلوف ومعاها في
الفجر مالتمام.. يوصل اليك المال.. مخلوف
والتجار يجرون بعيدا عن معروف
**(والدراويش مستمرون متداخلون مع المنادى
الرسمي)**

إظلام

اللوحة الثامنة

(يضاء أعلى المسرح عن

مخلوف يلعب يرمى لأعلى

باكياس المال فى هوس وقد

وقف معروف ويداه فى وسطه)

مخلوف : شايف يا معروف.. الوقات الوقات.. وفوا بالوعد

وجابوها.. والخزائن ح يملوه.. كده ح أبدأ من

جديد.. وفى شهر ح ارجع حديد

معروف : وكده انتهت مهمتى ؟

مخلوف : معقول يا صاحبى.. م اليوم شريك فى التجارة

وفى الخير اللي جاى

معروف : أبقى صحيح محتال

مخلوف : ما انا قلت راح أرد كل درهم وح ارضيهم

معروف : ده لو ح تاخد المال

مخلوف : أُمال ؟

معروف : المال ده ح يكون لهدف كبير يا مخلوف.. حلم
عاوزاه الجزيرة.. زى انت فى الأول ما كنت
محتاج لحلم البحر والترحال

مخلوف : (يحتضن الأكياس) لا يا معروف !

معروف : غير كده.. لا المال ده ح ينصحك.. ولا ح نبقى
أصحاب.. وتضيع يا مخلوف من تانى

مخلوف : عايز تزود جنانى.. م الأول وأنا قلت لكم وكان
اتفاق

مخلوف : الوقت غير امبارح يا مخلوف.. الوقت معركتى
الجزيرة كلها.. والبداية بالمال ده هنا.. وبالأمره
هناك .

مخلوف : ومالك بالأميرة هناك كمان ؟ دى عايزة طبيب
وأنا عارف شفاهها

(رفيف تهبط)

رفيف : عايز تروح لقوت وتشفيها

معروف : مرضها من مرض الجزيرة وشفاهها من شفا
الجزيرة

مخلوف : وده شأنه ايه دلوقت بمالى وحالى يا معروف..

شأنى ايه تورطنى

معروف : مالك خلاص من مالهم.. وشفاهم من شفاك

رفيف : كده يا معروف ح تواجهه كل فرمانات الجان

والقيامة ح تقوم ..

معروف : ح أقدر.. ح أواجهه الجان.. واللى جابوهم كمان

مخلوف : (يصرخ) رد عليه وسبيك من الجنية.. أنا اتفاقي

معاك تجيب المال عشان

معروف : (مقاطعاً) ما تستعجلش يا مخلوف

وشيل المال.. للى اهم من بيعه وشروره

مخلوف : وكان ده كله ف ايه.. وليه ؟

معروف : بداية وابتدناها.. لازم تكمل صح يا مخلوف

وأنا قلبى معاك.. كده ح تفتح باب جهنم.. هنا

وهناك

مخلوف : معروف.. (معروف يهبط نحو المقدمة)

معروف أنا رايع للقصر يا مخلوف

(إظلام لتضاء المقدمة حول فراش الأميرة

وحولها جعوب وبرجاس)

جعبوب : ماخذ انتقدم يا برجاس
برجاس : بلغنا كل الناس
جعبوب : مشى المنادى تانى وامنع ندا الدراويش الملاعين
برجاس : دول اوامرهم جايه من وزير الجان يا مولاي
ومش منى
جعبوب : ح تقوللى تانى الجان.. وأوامر الجان.. أنا اللي
م الأول غلطان
برجاس : وبفكرك تانى يا مولاي إن شفاء الأميرة مرهون
بأنها
الحاجب : مولاي واحد طالب اللقاء.. جاى للندا.. نقول له
ايه
جعبوب : وده شكله ايه.. شكله يطمئن يعنى يا حاجب؟
الحاجب : تاجر وله هيبة يا مولاي
برجاس : تاجر وييجى ليه ؟
جعبوب : انت بتحقق فى ايه.. روح قل له يدخل يا حاجب
الحاجب : التاجر معروف يدخل
معروف : (يدخل) السلام على ملك الجزيرة.. والشفاء
بإذن الله ح يكون لمولاتى الأميرة

برجاس : أنت مين ؟

جعبوب : بعدين بعدين .. تعالى يا ابني وفهمنى .. تقدر

بصحيح تشفى لى قوت بنتى

معروف : مولاي الملك جعبوب .. أنا عابر سبيل وللجزيرة

يزور .. لحظة سماعى للنذا فؤادى قال إن الشقا

مكتوب بإذن الله على ايدى

برجاس : (فى تهديد) والمنادى سمعت نداه

معرف : امال جيت ليه؟

برجاس : إن فشلت فيها موت

معروف : أنا قلتها ياوزير .. وأنا قد القول

جعبوب : اسمع يا ابني

معروف : خدام مولاتى .. ومولاي .. معروف ..

قرب يا معروف من قوت .. وقوللى شايف آيه

(معروف يقترب من فراش قوت)

ص معروف : زى ماحسيت من أول مرة .. وردة جميلة .. لكن

عليلة محتاجة زى الورد للشمس والهواء .. هوه

ده الدوار

(صمت)

جعبوب : ساكت ليه ماتقول يا ابني قول حاجة تظمن
معروف : (يمسك بيدها) ممكن مولاتى تقول بتشتكى من
أيه؟

برجاس : مش ح تقول
معروف : وليه ؟
جعبوب : فقدت النطق آخر مرة والبيان.. ولا كلام ولا همس
معروف : وقبلها ؟
برجاس : هو ح يقعد كده يسأل ويبخلق لها؟
جعبوب : قبلها كانت مرعوبة
معروف : (يخاطبها) من أيه يامولاتى الجميلة.. أنتى
مرعوبة؟

برجاس : ماقلنا مابتتلقش .. أنت مابتفهمش
معروف : بس أنا شايف عندها بتكلمنى من غير لسان
بتحاول تفهمنى
برجاس : ده ولد نصاب.. كذاب من أولها
**(معروف يتحرك وهو ينظر للمكان الذى يحمل
اللون الأصفر)**

جعبوب : أيه يابني .. بتلف ليه؟ بتدور على أيه ؟

برجاس : (يسخر به) على الحل يامولاي بيدور عليه.. قرب

كده قتله

معروف : الحل سهل

جعوب : طيب ماتقول يابنى قتل ماينده للسياف

معروف : الحل فى الالوان.. عشان ترجع الأميرة.. تلبس

ثياب ألوانها كتيرة جميلة

برجاس : (يصرخ) الولد بيقول ألوان! .. جاى يزود تهمة

العصيان على الأميرة يامولاي

جعوب : طب ماتشوف يابنى حاجة غير الالوان

معروف : هيه.. مفيش غير الالوان

برجاس : تبقى مؤامرة .. جاى قاصد هلاك الأميرة..

الكلب

معروف : خلاص .. ح اعرض نفسى الأول للهلاك.. وح

البس يامولاي قصادها الالوان

برجاس : لا .. ده شغل دجل وحواة

معروف : إذا كان الجن ح يسخطونى أو يخطفونى يبقى

خلاص.. مفيش على الأميرة خطر ماحصلش

ضرر

جعبوب : وإذا الجان سابوك.. يبقى الأميرة تقوم وتلبس

الألوان

برجاس : أنا رافض يامولاي الكلام ده من أصله

جعبوب : وأنا قابل الرهان..

بس يقدم البرهان ..

إظلام

(بقعة ضوء حول معروف يكمل ارتداء ملابس

ملونة زاهية.. وأمامه مخلوف ذاهل)

مخلوف : ايه هدموم ألوان !!

معروف : وح امشى بيها.. ولحد القصر ح اروح واقابل

الملك جعيبوب.. ده لو سابوك توصل ياشهيندر

لجعيبوب؟

خليك فى اللى عليك وبس.. ح تطلع من الفلوس

عشرين كيس وتتحصر .. تبدأ بناية المصبغة

يامخلوف.. قدامك شغل كتير وكبير مع ناس

الجزيرة

مخلوف : عشرين كيس ومصبغة؟! بعد اللى خده

الشحاتين؟ والمصبغة ليه؟

معروف : للمصبغة يامخلوف المصبغة من كل لون.. وخلال

أيام.. ح تكون جزيرة كلها ألوان.. ساعة

هاتخف قوت وتقوم

مخلوف : (يصرخ) بطل بقى جنان واسمعنى.. الفلوس دى

مزين حاتيحي جنبها.. وتروح بعيد عنى بألوانك

وجنانك بقى

مـعـرـوف : ماده برضه عشانك يا عبيط

مـخـلـوف : من الوقت خلاص.. أنا من سكة وأنت من سكة
يامعروف

مـعـرـوف : (يقاطعه) كده ح اضطر أشرح للناس الحكاية
يامخلوف ويعرفوا أنني مجرد إسكافي فقير.. وح
تطلع نصاب وأنا محتال.. مع أنها مش كده
خالص.

مـخـلـوف : بتهددنى يامعروف !!

مـعـرـوف : لمصلحتى ومصلحتك .. ومصلحة الأحلام
الحلوة.. لكل الناس.. وياريت تفهمها بقى

مـخـلـوف : مستحيل افهم كده !

مـعـرـوف : طيب لحد ما تفهم .. ح تنفذ وبهمة يامخلوف

(رفيف تظهر وهو يهم بالانصراف)

رفـفـيـف : معروف حبيبى احذر بقى.. دخلنا فى الجد يا
حلو

مـعـرـوف : بتحذرينى من أية ؟

مـخـلـوف : دى الجنية.. أكيد هيه اللى بتحذرك شايفة
المصيبة فى منظرک.. ح تهدها على راسى

وراسك يامعروف.. خلينا فى حالنا ومالنا وأطلع

الألوان

معروف : ياخسارة ما عايش عنده خيال.. ولا قلبه عاد

بيشوف يارفيف.. غير التجارة والسوق

رفيف : صاحبك محسور ع الفلوس.. وعلى حلمه

الصغير فى الوكالة معروف : ح يعرف أن الحلم

الكبير.. أهم من الصغير

مخلوف : (صارخا) حذريه يا جنينه.. ح يخربها عليه وعليه..

حذريه يا جنينه

معروف : ح يسامح لما يشوف.. ايه اللي ح يعمله معروف

رفيف : لكن برضه وللحق.. صاحبك عنده حق

معروف : ايه جراك انتى كمان...!! ماكنتى كويسة

متحمسة

رفيف : أبويا.. من دى اللحظة مش ح يرحم ولاحتى

بنته.. مادام ح تمس مصلحته وهيبته يامعروف

معروف : وأبوكى مين بقى إن شاء الله؟

رفيف : خوف.. ملك البحر المسقوف.. طيب أه.. لكن

مجنون

مـعـرـوف : بنت ملك الجان بحالة !!

رـفـيـف : وكان بينا رهان .. كان شايفه أبويا كلام .. دلوقت
ماعادش كلام .. كده قاتل أو مقتول .. ويانتتصر
يا حبيبى أو ننكسر ونضيع .. وياخدنى الملعون
الوضيع زوجة

مـعـرـوف : مين اللى ح ياخدك زوجة ده؟

رـفـيـف : وزير أبويا هدير .. الحقير

مـعـرـوف : يعنى أنتى وهمانى يارفيف وواقفة معايا
صحيح .. واقفه معايا؟

رـفـيـف : للنهاية .. بس اوعدنى ماتخلاش بيه ولا بقلبى
يامعروف .. إلا قلبى .. ياروح قلبى
«جناح قوت»

جعيبوب يتراجع خوف وقد وقف بقرب الوزير
برجاس .. معروف يقبل عليهم فى الملابس

جـعـيـبـوب : لا .. مش معقول !!

بـرـجـاس : استنى يامولاي عليه دلوقت الأرض تغور بيه

مـعـرـوف : أو تمكّن اتسخط كلب أو نسناس ياوزير برجاس

برجاس : خليك واقف كده على بعد ياملعون.. أوعى تقرب
من الأميرة

معروف : (يتوقف) خلاص ادينى مستنى.. الأرض تبلىنى
يالله يا أرض ابلعنى افتحى بلك وكلىنى.. معقول
ح أفضل كده مستنى!

جعبوب : (بدهشة وفرح) الله!! ما بيلعكش يعنى ؟
معروف : تحب أفضل برضه مستنى.. ولاتقص السكة
يامولاي.. ونروح على فراش الأميرة قوت على
طول؟

برجاس : (يصرخ) ح تموت..! لو راح كده ح تموت
جعبوب : إن شاء الله انت اللى تموت.. مد يا ابني وشوف
قوت.. قرب ما يهنكش

(معروف يتقدم نحو الأميرة المسجاة ويجوارها
الوصيفة.. روية)

معروف : (وهو يقف أمامها يستعرض ألوان ملابسه)..
شوفى يامولاتى الأميرة الجميلة.. ده.. لون أحمر
كما دم الغزال.. وده لون أزرق غامق وبنقطة..
كما السما الصافية مرصعه بالنجوم.. وده

أصفر ذهبى.. كما شعرك الذهبى.. وده أخضر
زرعى.. اللى هو أجمل شىء.. زى خضرة القلب
البرى.. زى برعم حب بينادى الرفيق

زفـيف : (تظهر معلقة فى الهواء) آه يافؤادى الغريق
مـعروف : وده يأميرتى الجميلة شال ولبنى اللون.. لبنى
كما لون الضحى والبحر متعانقين

رفـيف : أهـن يا حبيبى أهـن
مـعروف : ضحى وبحر لفين حوالين الكون.. وكل لون له
كون.. وكل كون له لون

برجاس : ده كلام مجانيـن.. ح انادى يامولاي حد ياخده
يسلسلوه

جـعـبـوب : (يهلل) اسكت دى قوت ابتسمت .. ابتسمت
ياناس!

روية : أبدا.. الأميرة بنفس حالها.. مااتغير شىء م
اللى جرالها

مـعروف : انطقى عليهم يامولاتى وردى

قـوت : (تعتدل) والدى

جـعـبـوب : (يصيح) حبيبتى

قوت : صحيح اللى قصاد عيني!!

جعوب : (يصرخ) اتكلمت .. (يرقص) اتكلمت

قوت : (تتحسس ملابس معروف) لابس ألوان

معروف : هيه الالوان

قوت : وماسخطوك الجان ؟

معروف : ولا أى شىء يا أميرة كان.. وانتى كمان ممكن
تلبسى ألوان

قوت : أنا لابس ألوان؟

برجاس : لا .. إوعى تصدقيه.. وأى لون ماتقريبه

معروف : لو كان جوالى حاجة.. يبقى يجرالها

برجاس : دى خيه.. ومنصوبه لها

جعوب : بس أنا بقى ياوزير وبقول.. بنتى ح تلبس ..
ألوان على طول.. وزى مايأمر معروف

قوت : اسمك معروف!

معروف : قومى بقى وسيفك م الخوف.. وأنا بستسمح
مولاي.. يتحضر للاميرة لبس جديد وسعيد
بأجمل الالوان

برجاس : مافى أصلا هنا فى الجزيرة قماش يانصاب

مـعـرـوف : مش كل قماش أصله ملون.. لكن بيروح المصبغة

يتلون

جـعـبـوب : مصبغة بتقول!

مـعـرـوف : ولو تأمر .. أبنيها على طول

بـرـجـاس : دى مؤامرة بانـت.. وأنا دلوقت بقول

جـعـبـوب : أنا بس اللي يقول .. أنا الملك جـعـبـوب.. بديك

فرمان.. تعمل مصبغة بأى شكل وأى مكان

تختاره يامعروف

مـعـرـوف : وزى ماسمحت يامولاي للأميرة تلبس الألوان

قـوت : (تكمل) تسمح ياوالدى.. لكل ناس الجزيرة

مـعـرـوف : (وهو يقبل يدها هامسا) وأنا قلتها يا أميرة يا

جميلة.. شفا الجزيرة.. فى شفاكى.. يوم مايظهر

ضياكى بأجمل الألوان .

(إظلام ويضاء السوق عن تابلوه الأقمشة الملونة

وصناعتها..).

إظلام

هــديـر (يضاء حول قائمة عرش خوف تحت البحر)

حـوـف لعبة حقيرة.. لعبها الإسكافي معروف!
(يصيح) ضاعت هيبة مولاكم خوف.. انكسرت

هــديـر سطوة مملكة البحر المسقوف
لازم يامولاي توقف اللعبة.. نقضى على الملعون
قبل مايكمل على سمعتنا.. يقضى على سحر

رـفـيف الجان فى كل مكان
(تهبط) الاتفاق ياوالدى.. لاحد منكم يضره.. ولا

حـوـف أمد لى يدى فى أى شىء
لساكي ح تتكلمى يابنت خوف.. لعب العيال
واتحول لكارثة ومصيبة إنسى تافه صرماى

رـفـيف يتمكن من سطوتى على الإنس
ما اتمكنش.. كل اللى عمله.. ايه بيحقق حلمه..
حلمه اللى حرمتوا الناس منه.. يلبسوا الألوان..
أو يغنوا.. أو يتجنوا.. هيه دى حرية الإنس
يامليك الجان.. اللى فتحتها جوه قلب الإسكافي

حـوـف الفقير معروف
رـفـيف كلمة زيادة احطك فى القمم يابنت خوف

عايز يا والدى تخوفنى.. زى بقيت الإنس هناك؟
طب العيانة الهفتانة بنت جعبوب الهلفوت وقالت
لا .. عايز بنت خوف.. تخضع وتقول لا.. مش
حـوف تبقى غريبة!

يبقى حق عليكى وغضب خوف والجن ويا الهم
والغم لألف عام حطوها حالا فى قمقم مختوم
مـدير مولاي اسمح لى أتشفع.. وأنا أصلا ليه الحق
ويحكم الرهان.. إن الأميرة ساعة الفشل ح
تكون

رـفـيف (مقاطعة) الموت أهون يا حقير (يصيح) هاتوا
القمقم زى ما أمر مولاي خوف.. بس اللي ح
يخرجنى برضه.. هو حبيبي معروف.

إظلام

(السوق.. عودة إلى استكمال تابلوه الألوان
بالغناء.. حيث نرى قوت والملك ومعرّوف..
يخترقون الحشد وسط الأقمشة المنشورة
المصبوغة.. تخفت الإضاءة.. ويظهر بالمقدمة
هدير وبرجاس)

هدير : مش بس الألوان .. دى المغنى كمان. واختلطت
كل الأوراق.. جعبوب وسط الحرافيش.. والفرق
مفيش.. خرجت من إيدك يا برجاس.. ولعاد
لوجودك لازمة عند الجان
برجاس : لا يا وزير الجان.. لو تساعدنى ح غير كل
الصدرة.. بس ساعدنى
هدير : كان الاتفاق تخلع جعبوب وقت مانجدد وتحل
مكانه.. دلوقت خلاص ح نشوف غيرك ونقولك
كتر خيرك
برجاس : لامش خلاص.. ساعدنى أعرف بس جالنا الولد
ده منين؟.. كان فين الملعون وفجأة ظهر؟!.. إيه
أصله؟
هدير : ممنوع أنى أقول

برجاس : (يصرخ) وعايزنى أتحرك وحدى ازاي!!

دور على أصله فين.. دور تعرف ياسى برجاس..

لو عايز فرصة لسه ومتبتت.. (تعلو الإضاءة ويد

جعيبوب تشير إلى موقف الغناء)

جعيبوب : والوقت أحب الكل هايسمع والغنا فى بهجة

فرحتنا.. بشفاء أميرتكم قوت.. وبهجة الألوان..

اللى اتولدت مع أن معروف

معروف : والمغنى يا والدى كمان.. والناس اللى ماكنتش

بشاهدهم.. والوقت هنا حواليه قلوب بوش

بشوش.. كل ده على ايدك أهو بان.. وانكشفت

أكاذيب الجان

(تهليل)

جعيبوب : وعشان كده من كتر اللى فى قلبى.. مش طابق

أخبي ولا أستنى.. وح أعلن كده قدامكم أن قره

عيني قوت.. ح تكون زوجة لمعروف شهبندر

جزيرة النعام الهمام (يرتفع الغناء والبهجة..

وتخفت الإضاءة ويعلو عند برجاس وهدير).

برجاس : سامع .. وصل الحال أن الملعون يتجوزها ..
جعبوب يبقى فى جيبه .. والجزيرة باللى فيها من
الأميرة وبعد ده ومش عايز تساعدنى الحق ده
كله؟

هدير : بل ما أعظم هذا كله .. يا برجاس
برجاس : بتقول إنى يا هدير .. أعظم آيه!!
هدير : ده شىء يخصنى .. بس فايدته هناك .. لكن أنت
عليك تعرف .. نكشف هنا من هو الملعون .. وإذا
ماعرفتش هيه اللى بإيديها ح قسم كل شىء
(ترتفع الإضاءة ثانية لنهاية التابلوه).

إظلام

اللوحة الأخيرة
«مملكة البحر»

(إضاءة حول رفيف داخل
زجاجة مغلقة ..وقد وقف
أمامها هدير وقد جلس خوف)

رفيف : كداب .. كداب .. وحقير يا هدير معروف
ماتجوزش قوت
خوف : اهدى يابنت خوف.. يهمنى فى ايه أنه اتجوز
قوت بنت الهلفوت.. المهم أنه خلاص.. الناس
هناك صدقوه.. ومادام صدقوه.. يبقى مفيش
خوف.. يعنى مفيش معنى لسطوتنا
هدير : مولاي أحنأ الجان.. فى قبضتنا دنيا الإنس
التافهين

حـوف : اتنيل واسكت ما خلاص بلا قبضتتنا بلا خيبتنا .. وأنت عامللى ناصح وفالح وقاعد تأوح .. وجاسوس جاي .. وجاسوس رايح .. وكل اللي هاكم تيجي تغيظها وتقول قوت اتجوزها .. ياخي
آه

رفيف : هدير بيكدب .. معروف مش ممكن يتجوز قوت .. معروف ومعاهدنى .. معروف مش ممكن يخدعنى (تضرب الزجاجة من الداخل) مش ممكن لا .. لا

هدير : علشان كده قلت ياموى .. لأجل مولاتى تفوق .. وبأيدها ترد على الإسكافى اللي خدعها

حـوف : ترد ازاي يعنى يا فالح

هدير : هيه يا مولاي اللي تقول (صمت)

رفيف : لو صح كلامى .. الحقير هدير .. وثبت أن كلامه صحيح .. ومعروف اتجوز قوت .. ح يبقى رد موت

هدير : إن كان كده يامولاي بستسمح جاللتك .. نطلق سراح الأميرة رفيف .. من القمقم

رفيف : مش أنت يادون اللى ح تتشفع لى
حـوف : ولو أبوكى قبل يارفيف يخرجك .. ح تعملى آيه
للمعلون معروف؟
رفيف : ده لو قبلت أنى أخرج م القمقم أصلا
حـو : (يصرخ) لسه جنانك برضه حتى وأنت فى
القمقم؟!
رفيف : لأن أنا دلوقت .. وأنا وحدى بس .. أقدر أنقذ
هيبتك وهيبة الجان .. ده لو كلام الوزير الحقيقر ..
طلع صحيح .. بس مش صحيح
هدير : يبقى يا مولاي أرجوك اطلقها تروح .. وتشوف
بنفسها .. حفل زفاف المحتال معروف .. على قوت
بنت جعبوب الهلفوت
عجائز البحر : (يدخلون فى غناء جماعى .. مامعناه) .. خطر
معروف واتحقق زى ماقلنا .. وماعاد غير أن اللى
حصيرته وجابته .. تصرفه وتواجهه الأذاه .. يانغور
معاه (يعزمون لصرفه كما يتم التعزيم على
الجان) أمشى يا إنسى أمشى يا إنسى

(إظلام ويضاء حول مناد فى بقعة ضوء يتحرك

بطبقتين كبيرتين)

المبادئ : ياناس يا أهل جزيرة النعاس م اليوم يصير اسم

الجزيرة.. جزيرة الأملا لواناس.. بدل جزيرة

النعاس.. ياناس يا أهل الجزيرة المناسبة الكبيرة

دى.. يعلن مولانا المحبوب الملك جعبوب.. عن

حفل زفاف الأميرة قوت على شهيندر جزيرة

النعام السيد معروف الهمام.. غدا بإذن الله فى

ساحة القصر الكبير.. ياناس يا أهل الجزيرة

(إظلام وتضاء فى المقدمة عن مخلوف مقيد

بالسلاسل وأمامه برجاس وأحد الحراس يضرب

مخلوف بالسوط)

برجاس : انطق يا كلب وخلصنى.. ماعادش قدامنا وقت

أنت اللى جايب معروف وعارف أصله وفصله

وجاى من أى مصيبة قول

مخلوف : مولاي قلت أنا ما أعرفوش

برجاس : عشان ماتكشفوش؟ ولاخايف أنت تتكشف

معاه.. أكيد مرتب وياه م الأول ويمكن من زمان

مخلوف : مولاي أنا كل اللي عملته.. أنى استضيفته.. وعلى
التجار عرفته.. واصلا بالصدفة قابلته
برجاس : والدنانير اللي فى بيتك لقيناها؟
مخلوف : دى تخصه.. ده حساب بينه وبين التجار
برجاس : بينه وبين التجار؟ ولما بينكم يادودة؟
مخلوف : كفاية ياوزير برجاس.. أنا ما اعرفوش ياناس..
أنا ما عرفوش ياناس

إظلام

(جناح قوت.. ومعها معروف قرب الشرفة
وخلفهم تظهر المدينة مضاءة يتصاعد منها
الغناء)

قوت : شايق قصادنا الجزيرة يامعروف الليلة؟ بتتولد
من جديد.. ألوان بلون الطيف.. ومغنى بيرفرغ
عليها رفيف

(رفيف تهبط فى ركن)

معروف : رفيف!!

قوت : مطرح ماتحط عينك فى كل الجهات تلاقى الناس
قصادك لهم جناحات جناحات

جعبوب : (داخلا) وأنا مستعجل على صبيان وبنات.. بعد
الزفاف على طول

قوت : تعالى ياولدى وشوف الناس من نفسها بتعبر عن
فرحتها بالزفاف بكره

جعبوب : أنا أسعد مخلوق فى الدنيا ياقوت.. بكره يكون
الزفاف. وسط الجزيرة وعلى ضفاف بكره
الزفاف ياقوت أنا ياناس مبسوط

رفيف : (بصدمة) بكرة الزفاف يامعروف.. ونسيت وعدك

قـوت : الناس معاك يا ولدى مبسوطين
جعـبـوب : وأنا وسطهم لما نزلت.. كآنى يامعروف من جديد
اتولدت.. دخلت جوه البيوت من غير حراس
قـوت : ودخلت جوه القلوب قبلها يا ولدى
جعـبـوب : وكل شىء ازدهر يغنى.. حتى الخشب والطوب..
التجار حضروا أموالهم قنصاء معروف بدون
تأخير.. عمر رشيد وحرك فيها دم جديد.. إنما
قل لى.. إمتى يامعروف راح توصل سفينتك اللى
التجار مستنينها هنا والناس
معـروف : مولاي .. أنا ابتديت ها بداية.. ما هايكملها غير
الناس وياك.. وإذا كان عليه بقى
قـوت : معاها.. مافى شىء يتم إلا فى وجودك وسطنا يا
معروف
جعـبـوب : ح تكون دراعى وسندى
رفـيف : ماشى يامعروف.. ح نشوف (تختفى)
حـاجـب : مولاي الوزير برجاس حضر
برجاس : (يدخل وهو يصيح) دخلوه
جعـبـوب : هوه مين

برجاس : اللى متفق معاه

(يدخل جنديان يرميان مخلوف على الأرض)

جعبوب : مخلوف يا صاحبي

برجاس : انطق قصاص مولاك وقول

مخلوف : أنا ما عرفوش.. هو اللى جاني ماندهتلوش

جعبوب : ايه اللى بيجرى يا برجاس!!

برجاس : طلع الشهيدز متشرد ومحتال.. لايمك مال

ولاسفن ولاحتي جمال

مخلوف : أنت قلت كده يا مخلوف.. أمال وأنا ما اعرفكش

إزاي ؟

جعبوب : بتداری عن مصلحتك يا دودة معاه

قوت : والدى .. ايه الى بيعمله برجاس!!

برجاس : التجار شهيدوا يامولاتي أن ده كان مديون لهم

قبل ماييجي زميله معروف

قوت : برجاس عايز يفسد فرحتنا ويهد السعد اللى

حاوطنا بقدوم معروف

معروف : لو مخلوف قال إن أنا نصاب أنا راضي وأنا

حقول من هوو.. مسئول عن كل شيء وللأميرة

حكيت ياخبيث

برجاس : هو زيك.. متفق وياك.. بس أنت الأساس ياخبيث
جعبوب : اخرس بقى.. أنا عارف أيه القولة.. أصل السبب
أنى أفضل على طول طرطور.. وبأمر الجان
وبأمرك ياوزير مأمور ونفذ ياجعبوب كل شىء..
ممنوع.. والناس مسلمة فى خضوع.. وأنا هنا
ملك ومتنصب لكن فى الحقيقة مخلوف .. مطوى
وخدام للجان

قوت : لحد معروف مظهر وكسفكم وعرى الأعيابكم..
أنت واللى زقتك وساندتك
برجاس : مولاي لآخر مرة بحذر.. كده حطيت نفسك فى
بؤرة الخطر
جعبوب : خد اللى أنت جايبه وفوت.. ومصيرك يابرجاس
الموت.

(إظلام .. ويضاء أعلى القصر يمين المسرح على
حرس يطلقون النفير.. ثم تضاء الساحة وجانب
القصر ومدخله.. عن الاحتفال الكبير.. تابلوه عن
فرحة الناس.. بمعروف وبالحال الجديد حيث

يقف معروف وقوت وجعيبوب فى الشرفة.. الملك

يشير بوقف الأغاني.. صمت).

جعيبوب : قبل مانبدا الموكب السعيد أحب أقول لأهالى
جزيرة الأمل الناس.. أحب أقول وأنا جد فى
كلامى على طول.. إن خروجنا من الضلام اللى
عمنا وكبسة الجن وديولهم على قلبنا.. كان زى
ما قال معروف لما ابتدينا نشوف ونحس..
وساعتها صحى جوانا الحلم.. عمرنا وشجرنا
وغنينا.. بعد ما راح الخوف.. هتافات وملعون
الخوف.. عاش الأمير معروف **(تكرار)**

معروف : بإذن مولاي عندى كلمة أقولها.. بدأ أمل.. واللى
بدأ لازم بإيدكم يكتمل.. من غير ماتستنونى أو
تستنوا غيرى كانى طبعاً هنا وعديت.. أو كانى
ماجيت.. الحلم كان جواكم أنا ماجبتوش.. أنا
عابر سبيل مریت على الحلم جواكم .. يوم
ماجيت .

رفيف : **(التي تهبط من أعلى)** وناوى ترجع زى ماجيت؟

قوت : **(فى فزع على الضجة)** مين دى يامعروف؟

معروف : دى الجنية رفيف.. آيه عايزه يارفيف
رفيف : صبرك لمايشوفوا وأنت معاهم تشوف
(تمد يدها نحو منطقة مظلمة فى الساحة حيث
يظهر فى ضوء مفاجئ دمدمة زوجة معروف
والتاجر قنزوح)

دمدمة : إيه اللى جابنا هنا؟
قنزوح : مين اللى شالنا وحطنا ؟
معروف : دمدمة مراتى وقنزوح!!
قوت : مراتك قلت يامعروف!!
دمدمة : معروف!
قنزوح : ده صحيح.. اللى كان جوزك.. معروف الإسكافى
جعبوب : معروف الإسكافى
دمدمة : ياحوستى تانى.. يكون عشانك هنا جابونى؟
قنزوح : وأنا ذنبى آيه يجيبونى فى خلقته تانى؟ ناحسنى
هنا وهناك
رفيف : بالراحة ياسيد قنزوح وقول لنا
دمدمة : أنا اللى عايزه أقول .. دى حكايته معايا تطول..
ده ياما جوعنى ويوخنى الشحات.. على لحم

بطنى كنت ببات

قنـزوح : طول النهار قاعد على راسى بشاكوش معروف

الإسكافى ويغنى وينوح

دمـمة : استتنى ياسى قنـزوح ده عامل هنا بنى آدم

المفضوح.. ورسم عليها دى ايه اتجوزت عليه ولا

أيه ؟

جعـبوب : لا بقى أنت تطلعوا ايه؟ معروف هنا تاجر كبير

والنهارده أمير؟

قنـزوح : الإسكافى الحقيير اللى عمره ماحط فى إيد

عشر دنانير بقى تاجر كبير وأمير ؟

جعـبوب : (هامسا) بس طلع بالفعل إسكافى ياقوت..

خدعنا

قـوت : ماخدعنيش .. حكاالى.. ماخدعنيش

جعـبوب : حكاالك ؟

(برجاس يقتحم المكان بالجند..)

برجـاس : امسكو المحتال الغشاش

قـوت : لا .. والذى يقتلوه.. بلاش يهدوا حلمنا الجميل..

نعود لليل الطويل (رفيف ترتفع وهى تصيح).

رفـيف : جه الوقت الجن يردوا عليكم وعليه .. ويرجعوا
أسياد.. يرجع فى قبضتنا البلاد والإنس اللى
فيها

برجاس : خدوه .. على أعلى سارية علقوة (حالة
اضطراب)

المجموعة : (فى صيحات) لاسبوه.. سبوه.. سبوه.. الحقوة
ياناس حوشوهم.. هربوة (صدام مع الناس).

برجاس : أى حد من الناس يقرب منه يقتلوه.. وكل شىء
فى الساحة خطوه.. البيارق والأعلام.. (تقولون
معروف بعيدا وسط الصدام).

قطعوا الألوان.. مافى القماش ألوان.. ولاغناء
وألحان رجعوا هيبة الجزيرة بعد الخديعة
الكبيرة.. واللى تقاوم اقتلوه

(إظلام .. ثم إضاءة حيث.. معروف على منصة
الاعدام وسط فزع كامل)

صوت : (أه طويلة مولة لرفيف ثم إضاءة حوها تبكى)
معروف : (يلتفت وهو على المنصة) طب ليه؟ أنا كنت
صح محتال ورخيص يارفيف؟! اسألى نفسك

ليه م الاول حبيتي معروف الإسكافي الغلبان؟
رفيف : أنا اللي فعلى كان رخيص.. عميت فقدت الشوق
ضيعت بالغيرة أجمل جوهرة مافضلش غير
الشر تحت وفوق.. مافضلش غير نار الندم
ماجيت.. شمسك ح تغرب تغيب .. وأنا فى
الجنون والندم (ترتفع) امتى ياخذنى العدم..
امتى ياخذنى العدم

**(إظلام ويضاء حول قوت على فراشها فجأة
وبجوارها جعبوب وبالخلف ضوء القمر)**

قوت : لحظة معروف ماي موت.. ح تحصله قوت
جعبوب : برغم اللي عمله معايا ومعاكى أنا ودى أخلصه
وأفديكى.. لكن الكلاب حوالين القصر وأنا
خلاص رجعت يا قوت للأسر ..

قوت : قرب خلاص الفجر .. ح يموت.. وتحصله قوت..
معروف.. محصلاك .. يا ضيا عيني.

**(إظلام ويضاء حول معروف على المقصلة وحده)
معروف :** راح ييجى يوم يا قوت.. راح ييجى يوم ياناس
وبعد ما أموت.. والكون ده يتزين. بإيدين الناس

يتلون.. حب وجمال وحياة.. حر كما الطير
الطاير فى سماه ويفوت وراه كل الضلعة اللي
محوطاه ويسبح بجلال الله.. وجمال صنعه فى
الإنسان من غير سلاسل إنسى كان أو جان .
(غناء يرتفع وحبل المشنقة يهبط.. الغناء بصوت
جماعى يتحدث عن قرب وصول السفن التى كان
ينتظرها رغم أنه حلم .. وتضاء الخلفية كلها
بسفن قادمة مضيئة .. تزداد اقترابا والستار
يسدل ببطء شديد مع نهاية الغناء)

الختام

الفهرس

| | |
|-------------------------------------|-----|
| حساسة جديدة وميتافيزيقا قديمة | ٥ |
| الإسكافي ملكا | ١٣ |
| القسم الأول | ١٥ |
| القسم الثاني | ١٠٥ |

نصوص مسرحية

« نصوص مسرحية » سلسلة شهرية تصدر عن الهيئة العامة لقصور الثقافة وتعنى بنشر الأعمال المسرحية الطويلة من كافة الأجيال (الرواد - كبار الكتاب - المواهب الجديدة) . كما تحاول المشاركة فى إحياء حركة النقد من خلال دراسات نقدية مصاحبة للأعمال المنشورة .

« وترحب » نصوص مسرحية » بنشر الأعمال فى هذا الإطار .
وطبقاً للوائح المالية والإدارية المعمول بها فى الهيئة - على أن يرسل النص من ثلاث نسخ (كمبيوتر أو آلة كتابة أو بخط واضح مقروء)
مصحوباً بالسيرة الذاتية للمؤلف والعنوان ورقم التليفون .

المراسلات :

الهيئة العامة لقصور الثقافة

١٦ ش أمين سامى - قصر العيني

الدور الحادى عشر - إدارة النشر

رقم بريدى : ١١٥٦١

صدر من هذه السلسلة

- ١- شباننا في أوروبا عثمان صبرى
- ٢- حلاق بغداد ألفريد فرج
- ٣- الحامى والحرامى محفوظ عبد الرحمن
- ٤- آخر الفرسان محمد الشربيني
- ٥- عاشق الروح بهيج إسماعيل
- ٦- الكلمات المتقاطعة نجيب سرور
- ٧- ملك العرب محمد سيد عمار
- ٨- حدث في بيت المنجى أيمن عبد المقصود رزق
- ٩- ملك الزبالة السيد حافظ
- ١٠- زمان الهنا محمد زهدى
- ١١- الملكة بلقيس لطيفة عبد الله
- ١٢- زفاف عروس المكتبات د. أحمد عثمان
- ١٣- القاهرة ليه ؟ ! مجدى الجلال
- ١٤- من فصول أبو عجور درويش الأسيوطى

- ١٥- حوش آدم محمد امبابي
١٦- إختاتون منصور مكاوي
١٧- عريس لبنت السلطان أوبريت .. محمود الطويل
١٨ عاليها واطيها كرم النجار
١٩ الإسكافي ملكا يسرى الجندي

رقم الإيداع: ٨٥٩٠ / ٢٠٠٢

شركة الأمل للطباعة والنشر
(مورافيتلي سابقاً)